


NLOPE NINRUMA

NSU NOOHISUWANYEYA

 Kooxukhuru vanci-ene, Munna Demos. Mureerelo muulupale okhala vamuthukumanoni va wa oKristu ohiyu ula, ohitto nno elapo ela yoriirya. Koolikarela owaani, okathi vakhani ovinre, ni siri ntoko ikharawu miloko miili voovihaxa, Onkela epheyo wu, ovikana ohitto nno. Tthiri kooruaha eyo ni miyo. Kinimwaakuva kihokolowe, naanaanoru. Miri sothene sinooriiriwa. Munuupuwela exeeni wa yeeyo, Creechy? Eyo e . . . [Munna oniira, “Ti wooriirya.”—Mol.] Vekeekhai ti yeeyo.

² Ni kootteeliwa murima mwaha wo omusuwela pastore ola ooreera murima, ohiy’ula, ni owoonani nyuwo atthu. Kinoomalaru ophiya, okathi vakhani. Kinkhuma oTucson, weiwo waarinaaka orowa olelo. Kaamweettiha nsana ohiyu, nto kiphiyale iwoora soophiyaka piili ni minuutu miloko miraru voosiis’ula, oTucson. Vano nto nkirumpe nihiku nothene, ohitto iwe. Ni kikhumme okathi vakhani . . . Ahe, kiphiya, kiri vaava ntoko ewoora emosa ni nuusu, woona waka, etthu siiso, vaava. Nto siiso nkirupanxe. Masi kinimwiilipiha wira kihirupe vaava. Masi no—nootteeliwa murima okhala va.

³ Mwammirav’ola, aarumiha va ni miikoro iya. Miyo khukilaathi ottuli iwe, vo . . . voopuroni va axinamwane. Mwammiravo mmosa khurwa, khukiweha vootikiniha-vo. Miyo khwira, “Hiyo anamwane othene pooti okilaathi vamosa, kahi siiso?” Vano, vekeekhai kinnaaphenta axikhaani awo, tthiri.

⁴ Ni ti, oh, ti yooreera saana okhala va ohiy’ula, ni okhalana muthukuman’ola wooreera w’atthu yeemenle-ene. Ni miyo kinniroromela vano wira Munna Williams ohooleelani sothene, ni wira Munna Rose va, mwaha wa muthukumano ontharelana. Miyo kinoona wira nyuwo moosuwela eyo. Onrowa okhala oRamada, naanaanoru, muthukumano w’Alipa a Nakoso. Ni ninniwehererya okathi wooreera iwe. Munna Velmer Gardner, namalavula ooreerela, a ikuru; ni arumeyi akina, Oral Roberts ni anci-ene, anrowa okhala weiwe. Ni ninniwehererya okathi wooreera mw’Apwiya.

⁵ Kinroromela wira, okathi uwo, nikhhalane muteko wo ovoniha nipuro nenlo. Uh-huh. Kaatthuna kaapikhane ni Munna Oral, ni nipake vamosa. Ayo, mulopwana. Eyo khiyaarowa okhala yooreera? Eyo yaamukhala e—ettukuwelo yeekeekhai, kahi siiso? Muteko wo ovoniha, oRamada wu, yaamukhala yooreera. Hiyo . . . Nto khino ninimwiira, moosuwela. Apwiya khino anoonivaherya yeeyo, okhalana muteko wo ovoniha. Tivo

hiyo... Vano ninrowa, okhuma ekereja ni ekereja, ophavela omwarya mihupi sooreera, ni opatthana mmosa ni mukhwaawe, ni okhalana opatthana mmakerejani soohiyana-hiyana sothene. Ti yeeyo hiyo enaamini-ahu, wira hiyo nri mmosaru, mwa Kristu.

⁶ Miyo kaalavula nihiku nlo ni meetiku mmosa. Kihanle okhuma kirowaka ilapo s'okhopela, nto muhaana omwaleiwa mw'erutthuni. Tivo miyo kaaroorowa omwaleiwa. Vano owo khukihela vasulu va itthu iye sa mawipi... Miyo... Muhikikohe exeeni iyo. Vano owo khuphwanya ethu yootikiniha. Vano owo khutthika ni khaawerya osuwela, vano owo khwiihana nikhuru na mameetiku, nto owo tthiri khaawerya osuwela eyo. Owo khwira, "Nkinatoko woona eyo khalayi." Ni siiso owo khukooniha elatarato ya yeeyo, moota voolimaleleya muupuwelo, ni nyuwo mookhalana muupuwelo va vathi, ni iyo siri soorakamelana mmosa ni mukhwaaya. Masi owo aahoon wira sawaka saari vaavo vamosa. Khwira, "Nyuwu mwa mutthu ootikiniha saana."

Miyo khwira, "Miyo kweekwe kinnisuwela eyo. Atthu othene annisuwela."

⁷ Khwira, "Hiyo niira nihinatoko woona eyo khalayi." Tivo owo khupacerya okileeliherya yeeyo.

⁸ Miyo khwira, "Ahe," miyo khwira, "moosuwela, kinoona wira Apwiya ooreera murima, okathi Awo annipakaaya, annipaka voovirikana vakhani paahi. Hiyo khaninlattana mmosa ni mukhwaawe, nave-tho imaara sikina hiyo hata khanniira voolikana mmosa ni mukhwaawe. Masi—masi Awo aniipakela Yaawo... Enamuna Aya Yaawo yo opaka. Hiyo ninkela paahi mmaakinami oowuupa maalupale, ni ninkhala oomaala paahi, Awo anoonuupa enamuna Awo antthunaaya wira nikhale."

⁹ Ni miyo—miyo koosuwela wira khaavo aarowa otthuna okhala ethu yoovirikana ni ele nyuwo mukhanlyaanyu. Ethu emosa paahi othene nikhanlyaahu otthunaka... Vammalaahu woopoliwa khukhala aana a Muluku, ethu emosa paahi hiyo entthunaahu onkhala mweettelo vakhiviruxa khula nihiku. Ti yeeyo hiyo entthunaxaahu, mwaha wo opatthana iwe wuulupale. Moota oryaaya wooreeraxa! Mwaahitoko weemela khuupuwela paahi exeeni naarowaahu wira nahaakhalanne yeeyo? Exeeni—exeeni... Vaakhanle wira nrromelo ole muulupale khiwaamumula mwa hiyo, naarowa wira exeeni?

¹⁰ Miyo kaamuhimya, ekereja emosa, mukitthuniherye... Yoopacerya, nipuro nimoso, nto nikina, ni elapo yothene kinihimya moonelo mmosa, ni imaara sikina kinoona wira kinnitthikela yeeyo ekereja emosaru. Masi kaakhuma mpaani vaavo kaakhanlyaaka kilavulaka voolipa-vo, mwaha wa atthu ala olelo yiinaka eyiinelo ela awo arinaaya, awo aniihanaaya

twist, wala etthu siiso. Nto miyo khwira, “Nkinsuwela tu, exeeni olumwenku, atthu antthunelaaya wunta metto saya ni—ni wira siiso.”

¹¹ Vano, aahikhala mulopwana mmosa, oophiyaka miyaakha miloko miili ni mithanu na mosa, miloko miili ni mithanu na miili, aakikumananne wiithela, khwira, “Okathi vakhani paahi, Mwenye Branham.”

Miyo khwira, “Ayo, mulopwana?”

Owo khwira, “Moosuwela, nyuwo khamunsuwela saana.”

Miyo khwira, “Kinroromela wira nkinasuweleke.”

¹² Vano owo khwira, “Moone,” owo khwira, “Kinniwerya woona mpanтта anyu.” Khwira, “Nyuwo mwa mulopwana a miyaakha miloko mithanu. Masi mwaarina munnuwelo aka, yaamukhala yoovirikana.”

¹³ Miyo khwira, “Nwehererye minuutu mmosa.” Miyo khwira, “Miyo kaalaleya Ehapari yooreera okathi waarinaaka miyaakha muloko mwaamukhaani woovikanani nyuwo. Nlelo kinnaamini Ehapari yooreera yeeyo emosaru. Koophwanya etthu enranttela, ni wookhala ohakalala wunci-ene mwa waarumeela Apwiya ovikana itthu sothene xetwani aakhanlyaawe opakaka khula nipuro.” Eyo e . . . Eyo ennivaha otteeliwa murima.

¹⁴ Nyuwo moosuwela, Davidi aahihimya, emaara emosa, “Ntoko etthove eninlelaaya muro wa maasi, munepa aka onnivoliwa nthona mwaha wa Nyuwo, O Muluku.”

¹⁵ Ni vakhala wira mootoko omoona mmosa wa axinama axikhaani, o—ovulanle-ene, khino alapwa envanre, khuropocola ekapatti yuulupale mpararini mwawe, wala etthu. Owo onivuuva ephome. Nto, owo, mwalapwa pooti omuttthara. Owo kahiyo ntoko mutthu. Ni owo onniwerya oxaya etthove ele hata wira enivuuva ephome wala nnari. Nto siiso enamuna emosa paahi . . . Etthove ele yaavuvuka ephome, enamuna emosa paahi ekhanlyaaya okhalaka ekumi onkhala ophiya nipuro nri maasi. Nto yawerya-ru ophiya nipuro nri maasi, eyo enoowurya maasi awo. Eyo enoohiya ovuuva ephome, ni—ni enoowerya oxeiha. Eyo ti y’akhili saana.

¹⁶ Masi vano munoowerya otthokelela, omoona mmosa wa axinama awo axikhaani ovulanle ni ovuvuka ephome, ni moota onivenxaawe muru awe mukhaani, ni esimu yothene owo orinaawe wo wiimurya vari maasi, ni ephula awe. Vekeekhai, owo ohaana ophwanya maasi, ahiiso opweteya. Nto vano eyo ti ya ekumi ni okhwa, wa yoowo. Owo, ni khula—khula—khula eyiimureryo owo orinaawe, owo onimwiilipiha, onootthuna. Owo ohaana ophwanya.

¹⁷ Vano, eyo p’inamuna vantthuneya hiyo ovoliwa nthona mwaha wa Muluku. Munnona? “Ntoko etthove enihaawelaaya muro wa maasi, munepa aka onnivoliwa nthona mwaha wa

Nyuwo, O Muluku.” Wiipitihwa vamosa ni Yoowo nipuro nlo, ti otthuna wa murima aka. Ni kinniroromela wira iwo p’utthuna wa othene ale ari muumu ohiy’ula.

¹⁸ Nto vano, ohiyu p’uhiyu, ni miyo okisivela woona yeela. Ithoni munoonanyu nipuro nimos, nyuwo munnoona mw’akina. Miyo—miyo okisivela eyo. Nyuwo mooniheryaka opatthana wanyu, ni ohimya ele ekhalenlyaahu va.

¹⁹ Nto, oh, vekeekhai waamukisivela woona muhakalaliho wa enamuna ya khalayi oPhoenix. Oh, wulu! Nuulumo nlo *Phoenix* ninnikihakalaliha okhuma okathi woopacerya kisomme aka, ya yeeyo: Phoenix, Arizona. Wulu, mwammiravo, miyo kaahuupuwela, “Vaakhanle wira kaaniwerya ophiya nipuro nle! Vaakhanle wira kaaniwerya ophiya iwe, oPhoenix!” Nto vano koonaka, ni nikhalaka va nimphwanya noopwina-ene mutampini, ntoko mapuro othene makina, maturista anoophiya; anoowurya, meera, enamuttompe, sothene mmatatani.

²⁰ Masi, variyari va sothene iyo, anniphwanyaneya maniya ooreera Muluku otanthe-awe okhuma othakoni nno, anaarya veekharani ya athu oovuwa a Muluku. Nto ti yeeyo ekhalenlyaaka va, ohiy’ula, wira kiitakaihe ni nyuwo axinna alopwana n’athiyana, ophavela waariha Muthuko wa Pwiya Yesu wa akina, wira ewerye ophwanyiwa, nave-tho, mw’evitikavitika mu yuulupale. Ni anci-ene aya ari ota iwo nlelo. Miyo kookupali eyo. Nlelo aakhala akina-tho anrowa okela, ni hiyo nihaana wira sothene sinweryaahu wira awo aphiyee vaavo, ni okhalana makhalelo anrowa omooniherya Kristu.

²¹ Vano, nihinatthi osoma yoosoma yaamukhaani ya Yoolempwa...Miyo kivolonwe kiileliwe vanci-ene valempe aka soolepa kamosa-kamosa, ntoko muhina mwa minuutu mithanu. Ni miteko feteraale sa mpoosito wa soophwanya sookiveleeliherya naanaano soohimya kamosa-kamosa, kaarinaaka ovahererya voottharana, ni sihaana otthittiwa ekharimpu, kinoona wira, khino olelo. Ni siiso kihaana ophiya okureyu. Nto vaphiyalyaaka, Billy khwira, “Vanreerela waakuva.” Nto siiso va. . .

²² Miyo kaahirukurerya, orukurerya, orukurerya, ni athu awo. Wulu, oh, wulu! Ntoko awo sinihimyaaya exariya eri vamikhora va opwaro. Miyo kinniikoha vatthu vary’aya. Ayo. Nkinatoko woona yeeyo. Ni awo yaatthuna wira kilive mpoosito wa soophwanya mwa khula exeeke kaavahiwaaka mwa miyaakha miloko mithanu sookiserya, wira kilive iteeni sa ekampaanya, ni ephurelo mwa yeeyo, moone, itoolare ikonto imiya tthaaru ni miloko mithanu ni thanu.

²³ Miyo khwira, “Koopeliwe paahi.” Kaarowa wira sayi yeeyo? Miyo khwira, “Miyo nkirina hata isentavo soovikana miloko

mithanu.” Miyo khwira, “Kaarowa owerya sayi yeeyo?” Ni awo annikhalaha ookutakutheya mwa miyaakha mithanu.

²⁴ Vano, sa atthu ansokha. Ntoko, hiyo ninkhalana ekampaanya, ni—ni atthu, awo annisuwela paahi wira nsina naka ti William Branham, awo anlepa exeeke paahi ya ithumelo. Arumeyi annikhapelela eyo. Miyo nkinakuxeke yoovaha kookhalaru. Nto tivo awo anaakhela...Miyo kinaakhela e—elivelo okereja waka, itoolare emiya emosa khula esumana.

²⁵ Ni yoovaha ela...Masi khula mmosa, moone, awo ahenlyaaya mu...Nto voosiisu aya, o—o—o—ole aari mukhulupale a ekomite ya musurukhu, owo aahirwa khwira, “Munna Branham, nyuwo muhaana olepa ixeeke iya.” Nto, vano, miyo kaamulepa paahi. Owo aampweha. Nto nuumala awo khuwehaweha oratteene, ni hata esentavo emosa yoorumeeliwa mwaha wa miyo. Masi okathi waalepaaka exeeke ele, awo ahimye wira yaari yawaka. Atthu arookivaha, vano miyo khuvaha ekereja. Oh, wulu!

²⁶ Miyo kaahoono ohikhala saana, woopaceryani, vano khusuwela wira khula mutthu mBibiliani, kookupali, otonko okhalana muteko wa erooho wa Muluku, aahikhala oovariwa ni kuveerunu feteraale. Mphavele ottuli musuwele. Ti yeeyo. Moise, Daniyeli, Yohani Mpatisa. Yesu Kristu okhwiye mmatatani mwa kuveerunu feteraale, ni ehukumu ya okhwa. Petru, Yakopo, Yohani, Yohani mulipa-oowuupulula, othene, khula...Othene yaahilupatthiwa.

²⁷ Mwaha wa xeeni? Ti ekhukulu ya Satana. Mwaahisuwela yeeyo? Mwaahisuwela, Satana aahimuweliha Yesu khumooniha omwene wothene, olumwenku, okathi mmosa? Nto owo khwira, “Iyo ti sawaka. Miyo kiniiriha ele entthunaaka. Munnona? Ni kinimoovahani Nyuwo muurama-ru mukikokhorela.” Tivo munnooni ti sawani? Ennininanara wuupuwelela yeeyo wawihu, masi ti siiso.

²⁸ Vano Owo khwira, Yesu khwira, “Khuma va, Satana.” Owo aahisuwela wira aamurowa orithi, oMileeniyu. Owo aahisuwela wira iyo saarowa okhala Sawawe okathi...Okathi, ilapo iya seettihiwa ni Muluku, eMileeniyu yaamwiira epacenrye. Masi onookhala okathi.

²⁹ Awo aakhalana N.U. ni Ipatthanelo sa Ilapo, ni sothene, wira ephavele oruha murettele. Masi vakhalaru wira Satana toneettiherya, ni ipoliitika, exeeni enrowa okhumelela? Awo anoorowa owana vekeekhai.

³⁰ Masi onophiya okathi ikapwitthi sothene sinrowaaya wuukeliwa. Nto enooruma erumelo ya emaaleleyo, ni voosiisu Ohinimala onookokola, woowaarya ni wowooneela. Mwene ahu onookilaathi veehicieni Vawe. Oh! Onookhala ovuwiha; onookhala okhuwela. Ni enookhala epantera emosa, muxovo w'atthu mmosa, nloko nimosa, elavulaka nntaava nimosa, na

Wirimu. Amen. Miyo kinniwehererya okathi uwo. Ni kinniilipiha kirowaka mpakha mukaano, kimuroromelaka Muluku, nihiku nlo yamalaru, kinawerya wira...kinawerya omwiiwa Owo okireela, “Welakani nno.”

³¹ Miyo kiri nno oPhoenix ohiy’ula mwa Nsina n’Apwiya. Nka—nkaarowa weererya otaphulela etthu ekhumelenle. Anci-ene nyuwo atthu munkuxa ifiita, muhiyelelele ophwanya ele, *Okathi Xeeni Ula, Napwiya?* Eyo yaari kihinatthi okhuma owaani. Yoowoona emosa khukiruma wenzo; ti, nkisuwenle ele...miyo nki...miyo nkihiyo namatumiha ifiita, ni nkintumererya itthu iyo. Hiyo ninookhalana, ni nookhalana nakoso a ifiita mulaponi mothene. Ottaiwene wu mutakhwani ni mapuro othene, aakhalana etthu yaamukhaani awo anihelaaya mmaaruni, arinaaya, ni anniwerya okaravari mufiitani, ni weemela vale ni otaphulela eyo munttaavani. Ni enrowa mulaponi mothene.

³² Ni, masi emosa kaarinaaka, ele *Okathi xeeni Ula, Napwiya?* Ahiiso, *Ti Yoola Okathi, Napwiya?* Akina...Miyo...Saapatu ohiyu, isumana tthaaru sivinre, okereja. Nuumala okhalana soowoona ekumi aka yothene, kiira kihinatoko okhalana etthu ntoko yeela khalayi, kookhalaru. Ni nkinsuwela exeeni iyo. Miyo kiri va paahi, masi Owo orookiruma wenzo. Nkinsuwela etthu enihimyaaya. Miyo paahi...Miyo kiri wenzo paahi.

³³ Ni miyo kihaana okhala naxariya ni oororomeleya, ni eyo t’inamuna emosa paahi ninrowaahu okhalakhala niphiyaka nipuro ni Muluku, okhala naxariya. Okhala wira, atthu anoosuwela. Muluku onnisuwela, okhuma wopaceryani, wira nyuwo khamuhiyo, vakhala wira mwa naxariya wala nnari. Ni atthu anoosuwela. Okhala wira, emaara emosa, aahikhala mulopwana mmosa eererya olaleerya. Nto Muluku khwira...Ahiiso, profeta eekeekhai khimuleela, khwira, “Nrowe nuupuwele. Yaahikhala maprofeta hiyo nihinatthi. Profeta onsuweliwa paahi okathi olaleerya wawe oniiraneyaaya.” Tivo vanreerela nikupali wira noosuwela wira Muluku ohimmye siiso, nihinatthi ohimya etthu wa yeeyo. Mukhale a nneema ni naxariya.

³⁴ Vano nrowe nuurame muru okathi vakhani paahi wira nivekele. Vano nrowe nihiye ivelavelelele sothene vano, minuutu vakhani sinttharelana. Miyo kinniikoha...Nikhuru nla naamukhaani noophenteya n’atthu va ohiy’ula, koosuwela wira aakhala maniya ale akilaanthe va Yesu onrowaawe orweela nihiku nlo, anrowa ovenya okhuma vatthayani.

³⁵ Ni pooti okhala amosa-amosa va ahikupanli khama anoorowa okhala weiwo, wala nnari. Nyuwo khino munniphavela itthu sikina. Yaakhanleene etthu entthunaanyu mmakhaleloni mwanyu ohiy’ula, musuwelihe wa Muluku, nvenxaka ntata nanyu paahi, mwiiraka paahi, “Muluku, Nyuwo moosuwela enihimyaaka vano. Ni mukireerihe.

Ki—kinoowereiwa. Kintthuna openuwa. ko—koothweelela. Kinnitthuna otthikela opatthana. Ki—kintthuna kitthike. Ki—kinnivonyaka. Miyo kinootthika. Kintthuna wira Nyuwo mukikhaliherye, ohiy’ula, otthika.” Muluku ooreeriheni.

³⁶ Tithi a Wirimu, vano naattamelaka ehice Anyu, ni enamuna ya Ephome, maana, ni Aroni aahivolowa ohoolo wa mu—mukhuneelo, owo aakunxe, toko, ephome mmatatani mwawe, khukelela ohoolo, ni hiyo, mwaha wo waamini ohiy’ula, ninnaakhela Ephome ya Pwiya Yesu, ni ninneetta nirwaaka veehiceni va Muluku, voororomela, nisuwelaka wira nookhalana ehaakhi yo orwa, kahi mwa exariya ahu yoochi, masi mwa Yawawe. Ephome enthoonyerya okukutthiwa wahu. Nto miyo kinnivekela, Tithi a Wirimu, wira Nyuwo munivahe yoovekela ahu.

³⁷ Yoopacerya, ninoovekelani wira munimorele ikharari, munilevelelaka sootheka sahu sothene, okathi onlapaahu soovonya sahu, ni soovonya sahu sikhaani, ni itampi sahu sa siiri, ni itampi sahu soohisuweliwa. Ni hiyo ninnilapa nave-tho ntoko arumeyi, niryene anamukuttho, itampi s’atthu. Vamosa, Pwiya, hiyo ninnivenya. Hiyo ninnaaphenta atthu. Hiyo ninnoona ntoko Moise okathi waairihenlyaawe v’ephakani, wira owaakiherye atthu, oviruwa wa Muluku. Mooniheryo xeeni waari ule, wa exariya ya Kristu, okathi Kristu aaikelinhe-awe v’ephakani, wira owoopole atthu!

³⁸ Nto, Tithi, hiyo ntoko arumeyi Awe, ni Erooho Awe mwa hiyo, khula muKristu mu ohiy’ula, onneemela mwaha wa natampi: “Muluku, mwaamorele ikharari awo.” Hiyo ninnivekela mwaha wa aretta n’ale oothoiwa, wa matata awo ooreeraxa, akina aya atokweene, ni akina amiravo, ni akina munnuwelo wa eriyari, evenxaka matata aya. Nyuwo munnisuwela sothene, Pwiya. Ninvekela wira Nyuwo mwaakhule vootthariha mihakhu Sanyu mwa ovuwa.

³⁹ Akhale anci-ene ohiy’ula, Pwiya, ankhuma va, avolonwe, aryeene aretta, awo akhume, akumi, oopenuwa. Yiiranye etthu, awo ahinweryaaya hata otaphulela, masi ansuwelaaya wira awo akumii.

⁴⁰ Ale aronwe ottaiwene akhume akhalihewe anaxariya, Pwiya, esuwelaka wira aatthika khimukuxa Kristu vaavo yaamuhiyalyaaya Yoowo. Awo erowe, yahokoloxe. Munivahe, Pwiya, wira ale ahinatoko orwa aphwanye otaphuwa iwo wooreera wo okhala ootaphuwa, ookumihiwa mukayelani, oohitthukiwa-tho ni itthu sa molumwenkuni ni ovelavela wa makhalelo ala, masi ootaphuliwa mwa Kristu. Munivahe, Tithi.

⁴¹ Mureerihe sothene simphavelaahu vano, ni mureerihe Masu Anyu ni murumeyi Anyu, ni ninimoovuwihani Nyuwo. Mwa Nsina na Yesu hiyo ninnivekela. Amen.

⁴² Vano, vaakhanle wira naahaana osoma yoosoma ya Yoolepwa, wala Yoolepwa ya yoosoma, kiireke, aKorinto Oopacerya kapiitulu 14, eversiikulu 8, enisommwa so, mwa aKorinto Oopacerya 14:8.

Okhala wira nlope naruma nsu noohisuwanyeya, t'ani ontthuna wiilikanyiherya orowa okhottoni?

⁴³ Ela yaamukhala yoosoma yoophiyerya wira niwerye olavula isumana piili okhuma vano mwa yeeyo, ni hata okwannya vasulu-sulu. Masu aakhalana etthu eri yoowuupuxeriwa. Nyuwo munikhala voohihyererya mwa yoosoma yeeyo emosa. Munooverya omuluttaniha Bibilia othene ni yeeyo. Eyo ekeekhaii.

⁴⁴ Nihiku nimosa mulopwana mmosa aahikikoha, khwira, “Munwerya sayi okuxa yoosoma emosaru?”

Miyo khwira, “Oh, wulu! Nyuwo munnikumihya yoohimya vaavo ya etthu p'itthu.”

⁴⁵ Miyo kimuttotta terevu a makukhu mararu vathi, khunvenxa. Mulopwan'owo okilaanthe vaava ohiy'ula, a oTucson. Nto hiyo naari oPasadena, California. Nto miyo khwira, “Kaamuwerya omukuxa terevu ula a makukhu mararu ni olaleerya miyaakha miloko miili ni mithanu wa yoowo: moota eryaaya ekumi, eri muhina mwaya; moota, makukhu mararu, oryaaya oraaru mwa Mmosa. Nto, oh, oh, sookhala itthu sinci-ene saakhanlyahu ohimyaka mwaha wa yeeyo.”

⁴⁶ Ni ankhil Yoolepwa? Awo Masu a Muluku. Awo t'Ohimala. Awo—awo yaarina... Awo kharina emalelo. Awo anoorowa paahi, arowaka, arowaka. Ti ntthyawelo nahu.

⁴⁷ Nto vano ohiy'ula kintthuna kilavule wa yeela: *Nlope Ninruma Nsu Noohisuwanyeya.*

⁴⁸ Wuupuwelaka, woovira okathi vakhani, okathi waatthokelelaaka m... mwah'ole wa mpoosito wa soophwanya, miyo khuupuwela, “Enkhala ntoko khiyaavo etthu olelo eri yoosuwaneyeya. Sothene sookhalana ohisuwanyeya wa yeeyo.” Ni etthu p'itthu ekhanle yoohisuwanyeya khekhanle ororomeliwaka. Etthu p'itthu ekhanle yoohisuwanyeya khekhanle ororomeliwaka. Nyuwo mukhale ottaiwene wa yeeyo yaahikhale yoosuwaneyeya.

⁴⁹ Nyuwo mwakhalana nakoso; ni, yeeyo, nikhalanne ahu alipa a nakoso vaava, khino anci-ene aya. Mwaamweettaka nakoso ohikhanle oosuwaneyeya, khamunrowa ohelaxa munci-ene mwemmo, okhala wira e—ekawanelo ti yoohisuwanyeya, ni khumwaarowa ohelaxa musurukhu mwemmo. Wala, mwakhalaru mulipa a nakoso oosuwela, oolavilavi, munoolipelela ni ophavela, mwakhalanaru musurukhu wira mukelihe, mpakha ophwanya etthu eri yoosuwaneyeya, etthu eri yoolipaneya, etthu mukhanlyaanu olipanaka. Okhala

wira, khimuntthuna woopweteyani musurukhu uwo vakhani muurenlyaanyu, okhala wira ni yoowo muhaana okhalana makhalelo anyu, ya elivelo ya—ya ikawanelo sinkhuma mmusurukhuni yoola okelihiwe. Vano, nyuwo muhaana o—ophwanya etthu wira mukhaleke.

⁵⁰ Nto musurukhu ula vakhani nyuwo muurenlyaanyu, muhihele mpoolosani mwanu khuhiya mwemmo, okhala wira anawiiye aniwmiya. Munnona? Nnari, muhiire yeeyo. Mwakhalana vale, muhelele etthu. Nto nuumala muntthuna mukupali osuwanyeya wo okeliha wanyu musurukhu munakosoni. Vaahikhale siiso, vano, muhikelihe, nnakhala.

⁵¹ Tivo, anakoso vekeekhai ari ni mukhalelo woohilipa ohiy'ula. Khula nakoso, voowiiraka, mulaponi, ari ni mukhalelo woohilipa, okhala wira olumwenku ori ni mukhalelo woohilipa. Khimukhanle wiitthuniheryaka mmansinyu. . .

⁵² “Vano, kinrowa wuurela musurukhu *munci-ene*, wira kiteke empa yooreera, yaamukhaani nipuro nlo.” Eyo, eyo ti yoohilipaneya vanci-ene, kinimooleelani wira ti siiso, okhala wira kuveerunu aamuwerya okuxa, ohiyu mpakha voosiisu.

⁵³ Oh, itthu sirina etemokrasiiya ahu yoohononeya, mpakha ekhanlyaaya yoohilipaneya vanci-ene! Khalayi naaniroromelaka vanci-ene etemokrasiiya ahu. Ni, yeeyo, kinaamini aka wira enamuna yooreeraxa ya kuveerunu. Masi, nnakhala vo, etemokrasiiya ahu ti yoohilipa. Okhala wira, hiyo, elapo ela, atthu ahu, nookhalana malamulo, ni malamulo ala, ti—ti nuulumo nahu nookiserya. Masi, nnakhala vo, mwa yeeyo, malamulo ahu t'ohilipaneya, okhala wira aathikilasiwa imaara sinci-ene. Marehemu Mwenye Roosevelt aahiruua ehononelo mwa yeeyo. Tivo, moone, munnoon a wira enniweryaneya ohononeya. Khekhanle olipaneya vanci-ene yeeyo.

⁵⁴ Ipoliitika, oh, wulu, moota sihinlipaneyaaya! Atthu anoovaanyihana paahi, ni ovaanyihana, ni ovaanyihana, mwaha wa ipoliitika. Vano anamwaattamanani anoopwetexa opatthani, mwaha wa yeeyo, ni atthu yaatonko okhala apatthani ooreera murima. Onimoorwa mukhulupale mmosa, wala mutthu namwiivaha wira akhale namurummwa, wala etthu, nto mutthu mukina ori epantte ekina ya mukuso wa poliitika vano awo anooyakulihanaka mmosa ni mukhwaawe mpakha opwetexa opatthani mwaha wa yeeyo, ipoliitika. Ni miyo nki. . . kinroromela wira nkinkulihya miyoonelo sa mutthu, masi kinoona wira etthu yothene ti yoowuntta. Munnona? Ayo, mulopwana. Vano xeeni onyakulihanaka ni opwetexa opatthani mwaha w'etthu ehikhanle yooreera khula enamuna? Ti yeeyo. Ti yootakhala saana.

⁵⁵ Ookhala aakiirenle nihiku nlo, owo iirale, “Mu—munoorowa othanla mwaathanle ola?”

Miyo khwira, “Miyo koothanla.”

Khwira, “Oh, mwaathanle yoola?”

⁵⁶ Miyo khwira, “Miyo kimuthanlale Yesu.” Miyo khwira, “Miyo kinimooleelani. Yaahikhala athu anli yaakithanla.” Miyo khwira, “Muluku khukithanla miyo, vano xetwani khuthanla akivirikanyaka. Vano miyo khimuthanla Muluku, tivo miyo kithanlale aka oratta-ene.” Entthariha nipuro nyuwo munimuhelaanyu mwaathanle anyu, ekhumelo enrowaanyu ophwanya.

⁵⁷ Vano, nwehe, naanaanoxa va, wira kiwooniheni nipuro naamukhaani, vano nto ninohiya. Mwaathanle ola ookiserya oomuthanla mukhulupale, okathi yaalipiheriwaaya voomalela oChicago ni mapuro oohiyana-hiyana, wira maakina yaarinaaya wira ethanle-no, wira, awo yaaththokihwiwe ni partiitu Temokrata, wira khula okathi mwaamuthanlaanyu Mwenye Nixon, mwaahaana omuthanla Mwenye Kennedy, okathi mmosaru. Tivo, khiwaakhanle oweryaneya hata vakhani. Ni yaahooniheriwa!

⁵⁸ Ni nyuwo muhiwa *Monitoore* ohiyu umosa, okathi ya—yaaiveleliwaaya elapo yothene, okhuma Mississippi, onkhuma nsuwa. Mwenye Nixon aahixira mwaathanle ola a mutelefoonini, xexe wa emosa. Vanweryaneya sayi mutthu oxintta? Vaakhanle wira aari Mwenye Kennedy, yaarowa okhala enamuna emosaru. Miyo nkirina hata epartiitu.

⁵⁹ Eparitiitu Aka eri Wirimu, nto miyo kiri ni yaawo vaava ohiy’ula. Hiyo nikilaanthe mapuro a Wirimu, nilavulaka sa Mwene ahu.

⁶⁰ Masi, moone, kimpavela wooleelani, itthu iya sa mulaponi sinoothukumela. Khiyaavo... khimukhanle olipanaka seiyo. Ti soohisuwanyeya. Ni khula etthu eri yoohisuwanyeya, kaamwaamputi wiirakameliha. Nkinthuna etthu iyo yookhooiteya. Nkinthuna wiivitikelela epantte yookhooiteya. Enikisivela ya ekhweeli, okhala epantte ya ekhweeli.

⁶¹ Vano, makhalelo a vatthokoni aakhala oohisuwanyeya. Moosuwela, kaahimooni artiiku mmosa nihiku nlo, emosa wa irevista nipuro nlo, wira mwaattelo wa omwalana wa wAmerika muulupalexaxa ovikana khula elapo molumwenkuni. Ni nineemereriwa okhala elapo y’etiini. Ayo, vaamuweryaneya okhala yeeyo, etiini, yoohimmwa oratta-ene, masi kehiyo enamuna yoolikana. Munnona? Etiini ekhuneelo paahi. Ti yoolipa ohimya etthu eniirihaahu ekhuneelo ahu. Atamu aaheererya opaka emosa ya makukhu a efiiku, nave khiyaavanr’etthu. Yaari yoottikinyeya saana okathi waarinaawe okhuma wira akumane ni Muluku. Tivo etiini khemmaliherya ele entthuneya. Masi munnuupuwela wira eyaattelo ahu ya omwalana, ti yuulupalexaxa ovikana—ovikana ilapo sothene sikina, eyaattelo ahu ya omwalana? Ninniphwanya ohureya waacerereyaka mmawannyihu.

62 Yaari yootutuxa osuwela, wira, epursentu yuulupale ya ephavelelo ya elapo, ni mu. . . Kookupali wira waari Ohio, wira ephavelelo yaairiwe ya oKristu, ni yaari yootutuxa epursentu hata yahaarowa okereja. Vano nto, ipursento soophiyaka miloko mithanu na miraru w'ale yaarowa okereja, khayaasuwela xeeni yaarowelaaya. Awo khansuwela xeeni anrowelaaya. Awo anoorowa okereja paahi.

“Munrowela-ni?”

63 “Ahe, amaama yaaninikuxaka okathi waaryaahu anamwane, nto hiyo ninoothikhela nirowaka paahi.” Ni—ni nto, vano, epursentu ekina a yaawo, ahimmye wira yaarowela paahi mwaha wa, oh, wira yakumane n'ananwaattamanani aya n'ulavula okathi vakhani. Munnona?

64 Vano, ti yootutuxa! Khivanxankiha makhalelo a vatthokoni amalamanle-aya, moone, khula makhalelo a etthoko ahikhanlyaaya oolipa.

65 Khula muthiyana onrowa otheliwa ni mulopwana, ni owo aahikhale oolipa wa mulopwan'owo, vanreerela amuhiye meekhaawe. Ni khula mulopwana onrowa omuthela muthiyana, ni okhala oohilipa, vanreerela mmuhiye meekhaawe. Vanreerela nvekele mwaha yeeyo, wa yeeyo, mpakha Muluku oovaheni waakhula. Vano nto etthu Muluku ephitaannyaawe matthu ahimwalanihe. Masi hiyo—hiyo, toko, hiyo nihaana ovekela mwaha wa yeeyo, wa yeeyo. Ayo.

66 Vano, hiyo ninnoona wira nineererya orukunxa murima olumwenku ni mutthokiheryo w'osoma, ni vekeekhai ninniruuhelaka ehononeyelo ni yeeyo, tthiri ti siiso. Khivanweryaneya orukunxa murima olumwenku wa Kritu ni esomelo. Esomelo enoomurakameliha wa Muluku, ovikana omuruuha wa Muluku, okhala wira owo oneererya wupuwela wira owo t'ori oosuwelaxa ni onnisuwela onvikana matthu mukina. Enaamwi esomelo eri yooreera, Kristu khonarumeke ekereja Awe wira esomiheke olumwenku. Owo khonaasomiheke awo, wira epakeke iseminaariyu. Owo khonaireke e- . . . Oh, iyo ti sooreera. Owo khonatoko waaleela wira erowe yateke ixipiritaali. Eyo eri saana.

67 Masi muteko wa Ekereja olaleerya Ehapari yooreera. “Murowe mulaponi mothene, mwalaleerye Ehapari yooreera soopattuxiwa sothene.” Munnona? Masi etthu p'itthu yoovirikana ni yeeyo, ti yoohilipa, okhala wira eri ota wa mutthokiheryo wa Muluku.

68 Ekumi ya mulaponi ti yoohisuwanyeya. Ahe, olumwenku ti woohisuwanyeya. Hiyo ninkhala paahi nipuro vaavo olumwenku wothene onvololaaya mwaha wo wuukhuleya, enkhala ntoko, yothene enoothukumela. Khula elapo, atthu othene, emosa enoova ekina. Awo annilavula murettele.

69 Awo yaahikhalana, emaara emosa, awo yiirale, “Oh, hiyo nawana-ru Ekhotto Yoopacerya ya Mulaponi mothene, wira amiravo ahu othene ahaana orowa-wo, nto eyo enoomaliha ikhotto.” Vano, awo khiyaawenrye hata okumiha mwiixi wa artilyariya mpakha vaaryaaya mw’ekina.

70 Vano awo yaahikhalana Wiiraana wa Ilapo, nto eyo yaarowa okhala mupiliisa a molumwenkuni, nave khooceela. Vano awo aakhalana N.U., ni eyo etthu emosaru paahi. Eyo ehooceela. Khekhanle hat’etthu mwa yeeyo.

71 Itthu sothene ti soophilipa; makhalelo a elapo, makhalelo a poliitika, maakina a mwaathanle. Oh, wulu! Awo paahi . . . Etthu yothene yoothukumelihiwa, sothene.

72 Vano kintthuna kooniherye eyo vakhiviruxa vaavo enniphwanyaya. Munnona? Makhalelo a mukereja t’ottikinyiwa ni oohisuwanyeya. Vano, ti yeeyo Paulo aalavulaawe. Munnona? Ti yeeyo owo aahimyaawe, “Nlope naruma nsu noohisuwanyeya.” Makhalelo a mukereja aattikinyiwa. Atthu ti wo waarikela osuwela etthu yo wira. Awo anoorowa, yeettaka ekereja ni ekereja, ephavelaka osuwela tiivi erina etthu yooloka; okhuma nripu mpakha nipotto, ephavelaka ophwanya ele eri yooreera, vale ori-vo mwiixuttiho woolikana. Nto mmosa onimoorwa, ni onowerya otaphulela, mwa enamuna voolikanaka ni eyaaminelo aya, wira eyo ti yoolikana. Vano nto, naanaanoru, awo anoophwanya ohononeya wunci-ene mwa yeeyo, mpakha aneehereryaaya ekereja ekina, wira yoone ele ekhanle eyaaminelo aya, mwiixuttiho. Oh, mwa yothene ela, hiyo ninnoona wira nihiikawanya nto, mwaha wa itthu iya, mwa iyeettiheryo imiya sene sa ekereja. Vano, khiyaavo etthu ya nthowa ni yeeyo. Eyo paahi wira awo anoowerya wiira itthu sikina, nto, awo aniiraaya, vano ehaana okhala etthu yooreera enikhuma mwa yeeyo, nipuro nlo.

73 Masi, moone, muhiheleke nrromelo anyu mwa wira, “Miyo kiniira mpantte wa mwiiwanano wa ikereja Metotista, ni miyo—miyo kiri saana okhala wira kiniira mpantte wa yeeyo.” “Miyo—miyo—miyo kiniira mpantte wa mwiiwanano w’aPatista, ni kiri saana.” Nyuwo muhiireke yeeyo.

74 Khivanweryaneya hata wira yeeyo mwaahimyaka wira “muniira mpantte wa mwiiwanano wa ikereja s’ePentekosite.” Khivanweryaneya wira eyo. Nyuwo muhiireke yeeyo, okhala wira kehiyo. Ninniphwanya wira okathi mwiiwanano woopacerya wa Pentekosite, Ekonselyo ya Atthu othene, yaareheriwaaya, khuwaavinre okathi munci-ene mpakha vapacenryaaya ovalaana *vale*, ni ovalaana *va*, ni myaha, ni miixuttiho. Nto vano nkawehani paahi, mapuro othene. Munnona? Eyo enrowa wooniherya wira ti yoohisuwanyeya. Ale anroromela mutthenkeso paahi, ti—ti woohisuwanyeya.

75 Vano, nyuwo munimwiira, “Munna Branham, nyuwo munnikumiha erintta yuulupale nno. Munipintari elatarato yooripela saana.” Ni miyo kitthunne wira yeeyo. Kirootthuna wira.

76 Yookhala kiirenlyaaka, wira kiwerye ohimya yeela. Yookhala etthu yoosuwanyeya? Ayo. Yookhala etthu emosa eri yoosuwanyeya. Oh, miyo kinnitteeliwa murima vanci-ene mwaha wa yeeyo, wira yookhala etthu emosa mukhanlyaanyu ororomelaka, ni okhala oolipa wira eyo ekeekhai. Oh, okathi itthu sothene sikina simmalamalaaya, *Ela* enookhala. Nyuwo mwasomaru Matewu Oowaarya 24:35, Owo ohimye wira, “Erimu n’ilapo ya vathi sinoovira, masi Masu Aka khanvonyeya.” Muluku ookhalana mulipiheryo woolipa.

77 Mutokweene mmosa, aahimya emaara emosa, mutokweene mmosa ooriipa a Okuusini. Owo aamukunxe Bibilia, ni khaawerya osoma. Nto awo khwira, “Munimukuxerya-ni, Sam?”

78 Owo khwira, “Ti—Bibilia Oowaarya.” Khwira, “Mmo moolempwa.” Ni khwira, “Miyo kinnimwaamini, okhuma ekaapa mpakha ekaapa, ni kinnaamini ekaapa ene,” owo khuhimya, “okhala wira yooolempwa ‘Bibilia Oowaarya’ vaavo.”

79 Nto mulopwan’owo aalavula ni yoowo, khwira, “Nyuwo khimunaamini sothene siri Memmo?”

Khwira, “Ayo, mulopwana. Vekeekhai kinnaamini.”

80 Owo khwira, “Vano, ahe, nyuwo munihimya wira mwaamwiira khula etthu Bibilia ohimye’awe wira mwiire?”

Owo khwira, “Ayo, mulopwana.”

81 Khwira, “Ankhi Bibilia ole aahimye wira Sam atuphe avire muhina mwa exiri *ile* ya maluku vale? Mwaarowa wira exeeni?”

Owo khwira, “Kaamutupha.”

82 Owo khwira, “Ahe, vano, mwaarowa ovira sayi muxirini mwa maluku ehirina mwiithe vaavale?”

83 Owo khwira, “Bibilia aahimye-ru wira Sam atuphe, waamukhala mwiithe vale Sam n’uphiya.” Vano, eyo, eyo tthiri ti yoolikana. Waamukhala mwiithe vale.

84 Etthu emosa paahi entthuneya nyuwo wira, okuxa mweemereryo anyu mwa Masu a Muluku, nto Muluku onoopaka ephiro ya ele enihala. Oh, Mulipiheryo owo muulupale!

85 Kookupali wira Owo oohimya mwa Luka, kookupali waari, okathi waakhuruwaawe vamwaako, Owo aahimenryaawe awiixutti, “Athu aniira wira Miyo Mwaana a mutthu ki pani?”

Nto mmosa khwira, “‘Yeremiya,’ ni ‘maprofeta,’ ni siiso.”

Nto Owo khwira, “Masi nyuwo muniira wira Miyo ki pani?”

⁸⁶ Owo p'ukathi Petru aahimyaawe nuulumo nle noosuwanyeya, "Nyuwo mwa Kristu, Mwana a Muluku mukumi."

⁸⁷ Owo khwira, "Ooreeriwa ti nyuwo, Simoni, mwaana a Yona, maana erutthu n'iphome khewuupululenleni ila. Masi Atithi Aka ari Wirimu t'awuupululenleni yeela. Nto vamwala va Miyo kinooteka-vo Ekereja Aka, ni mikhora sa mookhwaani khasinrowa oxintta."

⁸⁸ Exeeni iyo nto? Vasulu va ekeekhai yowuupululiwa ya Masu a Muluku. Maana, "Wopaceryani naari Nsu, nto Nsu naari ni Muluku, nave Nsu naari Muluku. Vano Nsu nihiipaka erutthu khukhala." Ni aahuupululeliwa Petru wira ale yaari Masu oolipiheriwa a Muluku. Amen.

⁸⁹ Mwaha wa yeeyo Owo aaweryaawe wira, "T'ani onwerya okihimyana etampi? T'ani onwerya okihimyana Miyo? Itthu sothene Masu alempe-aya sa Miyo, Miyo kinniira." Muluku aahilipiherya eyo, wira Owo aari Masu. Oh, ti yeeyo. Muluku ohiisooniherya, Masu anihimya siiso, vano nto Muluku onikhaliha eekeekhai, onookhumeleliha, onnooniherya.

⁹⁰ Miyaakha sivinre, okathi awo yaahimeenryaaya ekereja, "Khekhanle etthu iyo ntoko opatiisu wa Erooho Yoowaarya, iwo wuukhuwa paahi atthu yiitanyale-aya" masi ale yaakhenle Yeeyo, yaanisuwela wira yaari ekeekhaii. Awo yaanisuwela wira Muluku aari eekeekhai. Ni ehooniheriwa, mpakha, olelo, wira mweettelo wa Pentekosite wa Muluku mulaponi, wookelihaxa mwa Kristu ovikana sothene sikina.

⁹¹ *Muletto Ahu a Ttiminku*, woohikhala khalayi, epaphelo ya ihapari ya eKatolika, yiirale, kookupali wira waari mwaisuri, wala mwaisana, mmosa aya, wira, "Ekereja Katolika yaalempe atthu oorukunxa murima emilyawu nuusu. Nave, aPentekosite yaalempe emilyawu emosa, ikonto imiya thanu." Amen.

⁹² Exeeni iyo? Eyo etthu eninnuwa, Masu a Muluku, emwareelaka ilapo s'okhopela. Moota nikhanyaahu oxukhuruku! Ti yoolikanexa, mpakha, hata naanaano va aPiskopaale, aPrespiteriyaano, aLuteraano, ni othene, anrwaaya waakhela ya Yeeyo. Munimoona vamuthukumanoni w'Alipa a Nakoso, munoowiiwa awo elavulaka oohiyana-hiyana: aPiskopaale, aLuteraano, Prespiteriyaano. Vano, eri ntoko yoorika omwiiwa muPentekosite airaka etthu p'itthu vano. Eyo ekeekhaii. T'othene akina. Mwaha wa xeeni? Awo arimoona otteettheya wa iyaaminelo saya, nto khutthikela Masu. Vaavo munoophwanya mulipiheryo, etthu ehinweryaneya ottikinyiwa.

⁹³ Munoophwanya mmwe, Erooho Yoowaarya ekhalaka Ekumi Awe mw'athuni, yiisooniheryaka Eneene wa olumwenku. Nto eyo enniwiiriha atthu ovoliwa ntthona mwaha wa Yoowo: oohittikinyeya, oohivaanyiheya, Masu a Muluku owooniheriwa ni aisooniheryaka Mmansawe, Masu Mmansaya ekhaliwaka

mwa ekumi ya mutthu. Etthu xeeni yooreerexa! Khiyaavo etthu yoohisuwanyeya wa yeeyo. Munoowerya woona vatthu Muluku omuhimmyaawe natiri, nto va owo onimooniheriwa. Miyaakha imiya sene sivinre maprofeta yaahilavula yeeyo, nto va hiyo ninnoona eyo yiiraneyaka.

⁹⁴ Ni wuulumeliwa wothene, ni ivirikanelo sothene, iyaaminelo sothene, moota yeerenryaaya onyakela Masu awo a Muluku! Moota awo yeerenryaaya orantteliha ni osoma. Awo aaphavela orantteliha, opaka muromolelo. Awo ahiitepanya mmansaya. Ni mwa sothene iyo, Masu a Muluku nlelo amphwanyaneya oowaaryaxa ni ookokola ntoko sitonko aya okhala. Exeeni iyo? Eyo etthu ekhanle yoosuwanyeya. Muluku ohimmye wira, “Siiso erimu n’ilapo ya vathi sinoovira, masi Masu Aka khanvonyeya.” Nto, eyo etthu emosa ekhanle yoosuwanyeya. Mwatthuna vale wiitthukela nankura, mutthukele nankura Masu yaawo mmurimani mwanyu.

⁹⁵ Davidi aahihimya wira aahiipitiha Yaawo mmurimani mwawe, wira ohiire etampi. Owo aahilepa ikano Sawe vanipottoni na olili, ni khwiitthukela mmatatani mwawe ni mapuro othene, aahela Masu Awe ohoolo wawe okathi wothene. Ti siiso. Mukhalihe muupuwelo anyu voohihererya. . .

⁹⁶ Muluku aahimuleela Yoxuwa, “Muhirukunuwele moonoo woolopwana nnakhala woothiyana, muhiyaka Yaawo. Siiso munooreeriwa iphiro sanyu. Vano sotheene sinimweetta saana.”

⁹⁷ Nto ekereja yothene yairaana vamosa ehiyaka iyaaminelo saya, ni okhala mwa Masu a Muluku, vano ekereja enookhalana mureerelo saana. Eyo enrowa okhala etthu enrowa ommaliha komunismu.

⁹⁸ Exeeni emukhalinhe komunismu. . .? Etthu ene yeeyo, nyuwo munuupuwelaanyu “komunismu,” okathi ammwaryaaya esuweliheryo aya, ni wunnuwa otuphaka, mwa imilyawu, ni atthu annimoova: komunismu uwo onoolakaseya ni okhwa. Ohaana okhwa. Komunismu, awo pooti wira *ela*. Awo pooti wira *ele*. Kookupali wira Muluku onoorowa omurumeela, masi, ti yeeyo, siiso ntoko Owo siiralyaawe ni Napukutonosoori. Owo onoonyaanya, e—e—e. . .nthakathaka nothene, ni komunismu. Masi, eyo. . .Nnari, onyakuliwa wunci-ene ni yeeyo. Masi, nwehe. Masi etthu ene, komunismu, onookhalana emalelo. Komunismu onoophiya woomalelani wawe.

⁹⁹ Masi Masu a Muluku kharina emalelo, okhala wira Awo khiyaarina epacerelo. Amen. Awo t’Ohimala ni Muluku. Ni nyuwo mwakhala oolipa ni nankura, ni Masu yakhala oolipa ni nankura mwa nyuwo, nyuwo munkhala Oohimala ni Masu. Amen.

¹⁰⁰ Ohaana ophiya woomalelani wawe. Itthu iyo sothene sinoothukumela. Voohicala moota xeeni nintekiwaaya nripu, nihaana omora. Itthu sothene sihikhanle, siri soovirikanya

Masu awo, wala soovirikana, sihaana okhuma. Sihaana ovaha opuro, okhala wira Masu animoorwa vooxintta. Khiyaavo etthu enwerya weemexa Yaawo. Muluku ohimnye siiso.

¹⁰¹ Owo aalavulaka, erimu n'ilapo ya vathi sinoovira, masi Awo khankhalakhala avonyaka. Mwiiipitihe Masu awo mmurimani mwanyu, moota w'okuxa Masu awo ni ohiya Awo wunnuwa. Mukhalihe Awo mmuupuweloni mwanyu, okathi wothene, okhala wira Awo khankhalakhala avonyaka. Masu a Muluku khanvonya, okhala wira Owo ohimnye wira Awo khiyaarowa ovonya. Tivo hiyo ninthuna nikhalihe etthu vaavo.

¹⁰² Vano, Paulo oohimya, mwa Soolempwa, ntoko omuxuttiha nakhotto, nakhotto ni nsu. Vano, nakhotto ohaana oxutta irumelo sa sawawe . . . sa nipettha wala nlope. Owo khonsuwela khama nlope ninruma, oruma, khama o—woopela wala khama otthika. Owo aahisuweleke evirikanelo aya, enamuna xeeni ya muttitthi w'anakhotto wootapanyeya mwaarowaanyu okhalana? Nwanani vekeekhai aamurowa oxintta nikhuru n'anakhotto yahaari ooxuttihiwa saana ovikana eyo. Amen.

¹⁰³ Owo t'uri mulattu ni ikereja sahu olelo. Hiyo nniwiixuttiha mwa iyaaminelo, soovirikana mmosa ni mukhwaawe.

¹⁰⁴ Nihaana wiiraana. Nihaana osuwela nlope. "Vano ti nvi nikhanye nlope?" awo annihimya. Nlope na Ehapari yooreera, ti Yeeyo. Masu a Muluku mukumi ti Nlope. Muhitakanxe hat'etthu ni Yaawo.

¹⁰⁵ Muhimutthuniherye mutthu omurumiha tthakare a eFransa, nto mukina orumiha nipettha. Khaavo onsuwela etthu yo wira. Eyo eniruuha otepanyeya.

¹⁰⁶ Ni Paulo aalavula mwaha wo omuxuttiha mulopwana ni nsu. Ni vootthariha nle nikhanye nsu, owo onnisuwela oratteene etthu yo wira, okhala wira nanipettha ookhalana iyeettiheryo, ni ti sa mukhulupale kapitawu. Nto owo aarumihaka nlope nla, anakhotto annisuwela oratteene nipuro no—n'orowa, ni nipuro n'otthika, ni khama orukunuwela moonoo woolopwana wala wootheryana, wala etthu yo wira, ni oruma wa nlope.

¹⁰⁷ Vano, anakhotto, ekhotto, kweekwe ennikhalka ekhotto. Hiyo khannitakaiha Mukereja, wala khaninkela Mukereja, wira nirweele orukuneya vapuwani. Nihaana osuwela wira ninrwa vapuwani va ekhotto.

¹⁰⁸ Miyo nkinarweeke wira atthu ekimane ottuli ni wira, "Munna Branham, nyuwo mwa mutthu oothamaleya." Nnari, mulopwana. Miyo kirwiye iwe ni nikula noowiisaakiha-no. Nkimphavela nikula noowiisaakiha-no wa yeeyo. Kinrwa ni ekapaseeti ni ekaruma. Kirweenle owana, owana khula esentiimetru ya nipuwa.

109 Muluku aahimuleela Yoxuwa, “Khula nipuro maravulo a inawu sanyu annyakelaaya, Miyo kihoovahani.” Tivo, maravulo enihimya ekhalanelo.

110 Ni ekereja yaphiyererya nipuro, eyo eniivahereryaaya iyaaminelo, ni wiisakaleliha ni Masu, ni wiivahererya olumwenku, miyo kinihimya wira, vano enoopweteiwa nipuwa. Eyo enoohokoloxerya ottuli.

111 Etthu entthunaahu ohiy’ula t’anakhotto wira emukuxe khula natiri a oMuluku a Bibilia ola, Muluku omulaihenryaawe Ekereja, ikaruma sothene sa Muluku, ni yeemele. Ti yeeyo entthunaahu, anakhotto; kahi okhalana ikuwo soolikana wira nooniherye moweettani woottharana, kweekwe ti yoovirikana. Okathi mutthu . . .

112 Khula elapo, hiyo nookhalana ahotteli khula elapo. Nookhalana ahotteli a wAlemaanya wenno. Nookhalana ahotteli Ankelesi wenno. Hiyo nookhalana—hiyo nookhalana ahotteli oInklateera. Awo amphavela wira exeeni? Awo amphavela osuwela muthinto xeeni wa ikaruma, muthinto xeeni wa ekapwitthi, mukina orinaawe. F.B.I. ori ntoko khula elapo. Awo animweettelela, wira yoone. Ti siiso awo anvuluwaaya. Awo anooweha ni woona muthinto xeeni wa ekapwitthi mukina onikhalanaawe. Vano animoorwa ni opaka yooreerela vakhani, wala opaka etthu wira ekhwelihe. Awo khanroromelana mmosa ni mukhwaawe, ilapo, okhala wira eyo enooniherya wira ilapo sinoothukumela. Vano, Inklateera aamuniphula kapatti-kapatti, muhina mwa ewoora emosa, naatumpheru ephiro awe, wala hiyo naamwaaphula awo kapatti-kapatti. Ontthuneya mutthu paahi ohoolo wa etthu iyo iwe, wira awurye ekaalisi emosa wala piili, vanci-enexa, wala ananariwe n’itthu, vano nto onimooopa etthu ene.

113 Nno woohikhala khalayi, awo yaamwiira, ekapatti ekhaani ya ekuwo, “Epakiwe oJapawu,” okathi wa ekhotto. Yaamurihela vathi, ni weetta, ntoko anamasiveliwa elapo aya. Nto vano munooliva ehisapo yuulupale yeeyo ovikana etthu p’itthu nyuwo munthumaanyu ya elapo ela. Exeeni yiiraneieye? Eyo enooliva ekumi y’aximiravo ale akhwiye iwe? Vekeekhai nnari.

114 Exeeni iyo? Nkincala moota xeeni onwanaanyu mwa itthu s’erutthu, munoorowa, khenrowa ohimya etthu. Enootathiwa. Masi yookhala ekhotto emosa mukhanlyaanyu okelaka-mo ni ophwanya nipuwa muhinkhalakhalaanyu mwaakhiwaka. Iwo p’uruma wa Ehapari yooreera wa Nlope na Masu a Muluku, ni wookuxa soovaha ni anatiri Owo aamanenlyaawe Ekereja. Vekeekhai ti yeeyo. Vano, ninnoona—ninnoona wira, ninniruma nsu nla na nlope.

115 Vano, khula elapo emphavela waavaha ikaruma amiravo aya ni wiisaakiha woolokaxa awo anweryaaya okhalana. Vano, miyo

koosuwela, imaara sikina ikaruma iya khasihiyo sookhweya otthepa.

¹¹⁶ Miyo kaahikhalana munna mmosa, “Rookie,” awo yamwiihanne aya, khurowa nno, nto anakhotto khimureya murupa wa ikhiilu miloko mixexe ni itthu ottuli wawe. Ni eyo yaari ntoko siiso owo aarulelaawe. Khimunnya efoxolo, wira othipe nlitti; kapwitthi, ni nikuttha na ikranaata sa mmatatani. Nto, oh, kiira kihinatoko woona murupa siisaale! Mwaamukhaani uwo waanimurikela weetta. Nto khimukuxa mphironi mwa mweettelo wa ikilomo thanu na tthaaru. Yaahala omwiiva. Owo khwira, “Ethiru ila ti ya zeeni? Kintthunelani ni ekapaseeti ila yuulupale ya khalayi?” Vano, nkawehani. Anakhotto annisuwela wira owo onophavela yeeyo imaara sikina. “Kintthunela-ni ni efoxolo, muramphani mu, keettaka?” Vanreerela mulimalele orumeela. Khino munoorowa otthuna.

¹¹⁷ Kuveerunu khonrowa owunnyani etthu vahikhanle wira munooosuwela...awo annisuwela wira munoorowa okhala oorumeela. Muhaana wiixutta yeeyo. Awo amphwanya itthu sooreeraxa awo anweryaaya ophwanya, wira yookhapeleleni ni yeeyo, okhala wira annicaliwa ni elapo. Awo annicaliwa ni nyuwo okhala ookhapeleliwa mwa enamuna yoolokaxa enweryaneya, wa ipholovolo. Kweekwe enkhalaka siiso.

¹¹⁸ Eyo epacenyee omatta wEdeni. Ni Muluku onnixuttiha Ekereja Awe. Ni e. . .

¹¹⁹ Moosuwela, hiyo kweekwe nihaana okelela ohooolo. Vano, matteeke a khalayi naarumeelakaahu ehinatthi Ekhotto Yoopacerya ya Mulaponi; Ekhotto Yaneili ya Mulaponi, vano, soonyakula iye sikhaani osulu saari sa khalayi voomalela, okathi akumiheriwaaya matteeke ala maalupale ooreeraxa awo yaarinaaya. Vano, awo khiyaari hat’etthu. Nto vano, ale yaarumenlyaaya ekhotto ela yookiserya, vano t’a khalayi. Awo khamphavela-tho. Awo arina axaatu. Ni, moone, nyuwo kweekwe mumphavela oreherya, oreherya etthu wira mwiisaakihe.

¹²⁰ Masi moosuwela? Muluku khorina oreherya. Muluku ohaavaha an’Awe, anakhotto Awe, etthu yooreeraxa yaakhanlyaaya ovahiwaka. Okathi Owo aavahalyaawe, Owo aavahale exeenii? Owo aavahale Masu Awe omatta wEdeni, vano mutthu aahaana wiilipiha ottuli wa Masu a Muluku, ni khaavo xetwani onwerya omukwannya. Mukhale Mmasuni.

¹²¹ Vano, nwanani muhotteli, Satana, aahiphavela osuwela etthu aakhanlyaawe wiiraka wira akele mwa yeeyo. Vano owo—owo aanisuwela wira khaawerya okhuma paahi voowooneya ni omuthepya muthiyana, vano etthu emosa paahi owo aakhanlyaawe wiiraka waari omuwerya amwaanyiharihaka. Ni ti yeeyo Muluku onvarelaawe muteko olelo, wira alipihe Ekereja Awe, ti Masu Awe. Nto Satana onoorwa ni ikuru so

waanyiherya. Satana aanisuwela wira vo ti vaari ephaka. Nlo ti naari nipuro atthu yaarowaaya ohiyerya vookhweya-vo, waari waanyiherya.

122 Nyuwo muniira, “Vano, mukihiye kaanyiherye ni nyuwo. Vano eyo ennitthuneya?”

123 Vakhala wira Muluku ohimnye wira yaanitthuneya wira vannitthuneya, vakhala wira nihaana wunla, ni naatekhume, ni wira yothene *ela*. Vakhala wira Muluku ohimnye wira opatiisu wa Erooho Yoowaarya onnitthuneya, khenikicala moota Eyo eryaaya yoolipa, ni mwaattelo xeeni wa olumwenku orinaanyu ohiya, muhaana orumeela Eyo, nimosa wa mahiku awo, wira mukhale mukumi. Enamuna emosa paahi yo ovuluwa.

124 “Vano, nihaana ovara ovoniha wa Muluku, nirina-ene mameetiku oosuwelaxa molumwenkuni?”

125 Muluku oovanheni ovoniha wa Muluku okhala wira Owo onnisuwela wira muhaana orumeela. Owo oovanheni soovaha sa Erooho.

126 Nto Satana amalakaru omwaattamela Hawa, owo aahipacerya waanyiherya ni yoowo. Vano, “Vekeekhai, vekeekhai, Muluku khaarowa wira *yeeyo*.”

127 Atthu aniira olelo, “Khekhanle etthu iyo ntoko omooroni.” Anci-ene a awo anooleelani yeeyo. Munnona? “Oh, vekeekhai Muluku khaarowa waapaha an’Awe.”

128 Vekeekhai, Owo khonaapaha an’Awe. Masi xetwani onimwaapaha, awawe. Nyuwo mwa mwaana awani? Eyo t’itthu enttharelana. Omooroni opattuxeriwe xetwani ni an’awe, kahi aana a Muluku. Khaavo hata mmosa onrowa iwe. Eyo ekeekhaii. Eyo entthariha wa ole mukhanlyaanyu mwaana.

129 Vano, Muluku aahinvaha Hawa ni Atamu Masu Awe, ni Owo khonarukunxeke Eyo. Owo kweekwe onnikhalanaka... muKristu, wala mulipa-oowaamini, Mwaakiheryo awe ti Masu.

130 Erimu n’ilapo ya vathi sinoovira. Khula eyaaminelo enoovira. Khula muromolelo onoovonya. Khula elapo enoopwina. Masi Masu a Muluku anookhala, Voohimala. Onoophiya okathi ettheneeri y’oxaka ehinrowaaya waarya-tho. Onoophiya okathi nsuwa nihinrowaaya waarya, ni mweeri ohinrowaaya waarya, ni olumwenku khonrowa ovilikeya muntthekoni mwaya.

131 Masi Masu a Muluku mahiku othene anookhala mamosaru. Ayo. Eyo etthu emosa ehinweryaneya ottikinyeya, etthu nyuwo mukhanlyaanyu olipanaka. Awo t’olipaneya. Muluku onihimya etthu, tthiri enimwiiraneya.

132 Vakhala wira Owo oohimya, omatta wEdeni, wira ntoko Nvuluxa, aamunveleliha Mesiya, yaari yoolipaneya wira aamurwa. Anaamwi yaalipelenle miyaakha ikonto xexe, masi

Owo aahirwa. Owo aahaana orwa okhala wira yaari Masu a Muluku yaalaihewe.

¹³³ Muluku aahilaiherya onveleeliha-tho Yoowo. Owo onookhala vaava. Miyo nkincala atthu akavi oohaamini ni oohoverya ankhumelela, etthu aniiraaya, moota xeeni komunismu onimwareyaawe, Yesu Kristu onimoorwa, ni onrowa okuxa Ekereja erapihiwe ni Ephome, ni onrowa okuxa mmukwahani wa osulu orowa Wirimu. Mwaha wa xeeni? Voohivonya enimwiiraneya. Masu a Muluku ahimmye siiso.

¹³⁴ “Mwaaweryaka wamini, itthu sothene sinniweryaneya.” Eyo ti yoolipaneya. Muluku ohimmye siiso, ni khenwerya ottikinyeya, khivanweryaneya otathiwa. Muluku ohimmye siiso, nyuwo mwakhalaru ni yeeyo paahi (Vano. . .) ni mwaamini yeeyo, mwaamini.

¹³⁵ Nlo khanihiyo nsu noohisuwanyeya. Muluku khokhanle ovahaka nsu noohisuwanyeya. Iyaaminelo sinniwerya ovaha nsu noohisuwanyeya. Miromolelo sinniwerya olaleerya nsu noohisuwanyeya. Masi Muluku khokhanle olavulaka nsu noohisuwanyeya. Vano Masu ala ti Muluku. Ni khuuvo ohisuwanyeya mwa Yaawo. Khula epante na yaawo ti yoosuwanyeya.

¹³⁶ Vano, Ekereja yuulupale ewarihiwe ekaruma ni Masu. Vano, okathi Yesu orwiiyaawe, Owo aarumeenle ekaruma emosaru yeeyo? Vekeekhai ti siiso.

¹³⁷ Okathi Satana orwiiyaawe wa Yoowo, mwa ikuru sawe sothene, nto owo khwira, “Nyuwo mwaari Mwaana a Muluku, mwiire itthu *khata*, *khata*.”

¹³⁸ Owo aairale, “Yoolempwa. . .” Otthikelaka olukama Masu. Satana khumwehererya-tho Owo vaalupale vakhani. Masi, Yesu, atthikelaka ni Masu, “Yoolempwa. . .”

¹³⁹ Owo aakhanle vaavo, vaMasuni vaavo, anoonihaka hiyo ntoko ethoonyeryo. Ntoko Owo sihimaly’awe mwa aKorinto Oopacerya, oopacerya. . . Yohani Oowaarya 14:13, “Miyo koovanheni ethoonyeryo.” Nto eyo ethoonyeryo, wira hiyo naahaana voolipiherya-vo, hiyo naahaana ohela ororomela wahu voolikana mwa Masu a Muluku. Itthu sothene sikina sikhale wootha. [Nipuro vahiitthu mufiitani—Mol.]

¹⁴⁰ Eyo t’itthu emosa eri yoolipaneya. Muluku oommana natiri. Muluku onoorowa ommaliherya natiri. Awo aniira, “Enweryaneya sayi etthu *ila* wiiraneya? Onwerya sayi Owo othukumanya nikhuru n’atthu vamosa, ni mahala a Wokuxiwani, wira awele?” Miyo nkisuwenle moota Owo onrowaawe wira. Kuhiyo mwah’aka okoha moota Owo onrowaawe wira. Muteko aka miyo okhala oolikana paahi wa yeeyo. Owo oolaiherya. Enoorowa wiiraneya. Oolipiha Ekereja Awe ni Masu.

141 Nto yoopacerya waari waanyiherya. Vano awo aniira, “Kahi yoothhokeleleya vano, vakhala wira kiniira mpantta w’ekereja *ela*, ele kahiyo yooreera ntoko ekereja *ele*?”

142 Eri Ekereja emosa paahi mukhanlyaanu wiiraka mpantta. Khamunrowa wiitakanxa-Mo. Nyuwo pooti wiitakanxa elooca, elooca eMetotista, elooca Prespiteriyaano, ni elooca Patista, ni elooca ya Pentekosite. Masi muniyariwa Mukereja mwa Yesu Kristu, tivo vo ti vari Ekereja.

143 Iyo ilooca, weiwo atthu anthukumanaaya, ntoko anakhuku anikotela erintta *ela*, ni ipompa erintta *ela*, ni—ni siiso. Iwo t’upatthana wanyu murinaanyu vamosa, mwaakawanyaka malyelo mamosaru.

144 Masi yaasiwaka Ekereja ya Yesu Kristu, eri ephiro emosa paahi. Onkhala Oyariwa. Oyariwa!

145 Onkhala ntoko mutthu, ntoko sihimalyaaka imaara sinciene, ntoko nthokolo varinttani, niphavelaka owara mapururu a mulalampi mmapuphani mwaya, ni wira, “Moone, miyo ka mulalampi eekeekhai.” Munnona? Owo orimwiihomeerya mapururu ale, mmansawe. Owo aari mulalampi eekeekhai, mukhalelo awe waammela muthinto ole wa mapururu.

146 Vakhala wira Ekereja ya Muluku mukumi ti Ekereja ya Muluku mukumi, Eyo enookumiherya Masu a Muluku mukumi. Khamurina waacereryaka mapururu a mulalampi hata nipuro. Ni khula nipururu mme ninkhuma mwa mulalampi eekeekhai. Nyuwo pooti waamini yeeyo. Ni khula nipururu nintakaihiwa Mukereja mwa Muluku ninrowa okhala Masu a Muluku. Owo khonkhalakhala akelihaka etthu ekina woohikhala Masu. Amen. Okhala wira, mukhalelo wa Erooho onkumiherya Masu paahi. Amen. Koopacerya woona okhala natiini. Khweeli.

147 Kahiyo etthu nyuwo muneereryaanu wira, etthu mumpakaanyu. Khimukhanle opakaka eti-...Khimukhanle opakaka woopowa. Khimukhanle opakaka soovaha. Muhaana okumiherya soovaha. Vekeekhai. Munnona? E—epwittipwitthi kheniira, eyo khenipaka manri. Eyo erina manri okhala wira epwittipwitthi. Eyo enookumiherya manri paahi. Mwi—mwi—mwiri wa serexa khompaka iserexa. Owo oniima iserexa paahi, okhala wira ekumi aya ti siiso.

148 Ni Ekereja ya Muluku mukumi khenikeliha-mo Ela, wira yeererye wiikhaliha yoolattana ni etthu. Awo ti yeeyo akhanlyaaaya, mwaha wa mahala a Muluku. Ni Masu a Muluku atakaihanne ni yaawo, vano awo atakaihanne ni Masu. Ni miteko sikumiheriwe mwa ole ooloka voomalela, Yesu Kristu, Muluku oowiiisoniherya mw’erutthuni, sinimwiikumiherya mmansaya mwa khula mulipa-oowaamini ooyariwa vasya. Owo ohimye siiso. Amen. Hat’etthu ekina. Vano, eyo etthu yoolipaneya.

149 Vano, eyo yaamukhala vakhani—yootikiniha vakhani wa mutthu, owo ahaatonko osuwela nsu n’eekeekhai na nlope. Vano,

mutthu ohinatoko wiixuttihiwa oruma wa nlope, ni ohinatoko wiiwa, ahe, vaamuweryaneya okhala ootikinihiwa vakhani okathi oniiwaawe etthu oruma voovirikana n'ile otonko awe wiiwa. Owo okathi wothene oiwale, "Mwiitakanxe mukereja. Mukuxe epaphelo anyu *nno* ni *nno*." Eyo pooti okhala saana. Eyo ti yothene owo onsuwelaawe.

¹⁵⁰ Masi nto okathi nyuwo onaakhulaanyu, mwaha wa opatiisu wa Erooho Yoowaarya, olavula mwaha wa owerya wa Muluku ni itthu Owo oniiraawe; ni moota eyo eniwiirihaaya athiyana n'alopwana, oowaili aya, wiikukuttha makhalelo a etampi; moota eniwiirihaaya weetta wa ntittimiho, ni wa nneema. Ni itthu eniiraaya, ni oruha opatiisu, olavula ilavulelo, waavoniha aretta, owoomola axetwani, olaleerya, soovaha, oh, soowoona, itthu sothene Mukereja. Aleluya! Eyo ekeekhaii. Okathi enrumaaya, nto eyo ti yootikiniha vakhani w'ale ahinatoko wiiwa muthinto owo wa nlope.

¹⁵¹ "Ahe," nyuwo muniira, "ekerej'aka kheniixuttiha eyo." Vano khenrumiha nlope na Ehapari yooreera. Ovuwa! Ekeekhai.

¹⁵² Masi w'anakhotto ale owiixuttihiwa, aleluya, vaniwaaya nsu nlo na nlope, awo annisuwela moota wo weemela oratteene. Hayani, Nakhotto muKristu! Ovuwa! Oh, eyo ti yoosuwaneya!

"Munsuwela sayi wira ti yoosuwanyeya?"

Eyo eri Mmasuni.

"Ahe," nyuwo muniira, "ekerej'ahu kheniixuttiha Eyo."

¹⁵³ Masi nlope ninruma Yeeyo. Miyo nkinthuna wiixuttihiwa eyaaminelo ya ekereja, okhala wira eyo enoothukumela emore. Masi vakhala wira nyuwo mooxuttihiwa Masu, erimu n'ilapo ya vathi sinoovira, nave Masu ala khanvira. Khula eyaaminelo, itthu sothene sikina, sinoomora. Masi Masu ala khankhalakhala evonyaka. Amen. Nlo ti nsu. Nlo ti nsu kintthunaaka wiiwa. Ayo, mulopwana.

"Oh," nyuwo muniira, "kinsuwela sayi?"

¹⁵⁴ Yesu ohimye wira, "Ipwittipwitthi Saka sinniwa oruma Waka. Iyo sinnisuwela nlope Naka." Owo oohimya, mwa Yohani Oowaarya, kapiitulu 14 versiikulu 12, "Ole onikaamini, miteko Miyo sinvaraaka nave-tho owo onoovara." Vano, Owo oohimya yeeyo.

Mutthu ahimya wira, "Ahe?"

¹⁵⁵ Aheperi 13:8 ahimye wira, "Yesu Kristu mmosaru nsana, olelo, ni mahiku othene."

"Oh," awo aniira, "mwa enamuna emosa."

¹⁵⁶ Vano, epwittipwitthi y'ekeekhai enrowa wira, "Uh-oh. Oh, etthu emosa yoonyakula, mmwe. Eyo khayiweye oratta-ene. Oh, nlo nihaana okhala nipettha n'eFransa. Nlo khinaari nlope, okhala wira Bibilia khonrumiha nsu noohisuwaneyya."

157 Owo onihimya wira, “Munimwaakhela Erooho Yoowaarya.” Kahi, “Nyuwo pooti.” “Nyuwo, khula mmosa.” Mpakha liini? “Awaya an’inyu, ni awaya an’aya an’inyu, n’ale ari ottaiwene, othene ale Apwiya Muluku ahu antthunaaya owiihana.” Owo onrowa orumiha nlope mwa khula muxovo ni khula nloko, ni awo animwiiwa Nsu Nawe. Awo animwaamini Nenlo, ale atthomeliwe Ekumi. Amen. Awo animwaamini Nenlo okhala wira aasuwela wira Nlo nlope na Ehapari yooreera. Khanihyo noohisuwanyeya. Khula nakhotto onnisuwela moota wo weemela.

158 Vano, nyuwo moomoona Petru, ni Yohani, Yakopo, ni ekereja yoopacerya, yeettaka erowasaka ohoolo enamuna yeela, okhala wira nlope, Yesu, iirale, “Murowe mulaponi mothene, mwalaleye Ehapari yooreera.” Marku 16, moone, “Ithoonyeryo iya sinimwaatthara ale anrowa waamini.” Ninnimoona Petru, Yakopo, Yohani, akina aya ethataanaka, wira yeette wa Nenlo.

159 Nave hiyo ninrukunuwela ephiro ekina, nihiyaka Nenlo? Mmosa onrowa ohoolo, mukina orowaka ottuli? Mmosa airaka, “Ahe, eyo yaari ya mukina. Eyo, nlo—nsu nlo, naari na mukina.” Oh, nnari. Khenweryaneya okhala yeeyo.

160 Muttitthi wothene w’anakhotto aKristu onniwa nlope. Muluku ohimnye wira nlo ti naari nlope. Owo khokhanle orukunxaka. Nlo ti nsu Owo ohimnyaawe wira aamurowa orumiha-no. “Siisa athu othene onoosuwela,” nto Ekereja enoorowa.

161 Akina w’awo khanaamini Orwa Wawe w’ekeekhai. Biblia ohimnye wira Owo animoorwa, tivo ninwehererya Orwa Wawe. Owo aahikhale vaava ohiy’ula, ninrowa owehereryaka voosiisu. Owo aahikhale vaava voosiisu, hiyo ninrowa onwehereryaka Owo meelo ohiyu. Ni ninrowa okhala niwehereryaka. Hiyo narupa vale, yawihu—yawihu...hiyo khaninrowa ohileya mahala-ene. “Tthiri nlope na Muluku ninrowa orumiha nlope nlo nookiserya, nto ale akhwiye mwa Kristu anoohihimuwa. Vano hiyo ninrowa ohala nryeene akumi ninrowa okuxiwa vamosa ni yaawo, wira nakumane n’Apwiya osulu, nakhale weiwe mahiku othene.” Iwo oruma wa nlope. Hata kikhalaka wala kirowaka, khivanvirikana hata vakhani. Kinimwiiwa nsu. Miyoyinoohihimuwa. Avuwihawe Muluku! Kinoohihimuwa. Oh, ayo. Ayo.

162 Yesu oohimya, wira, “Ipwittipwitthi Saka sinniwa nsu Naka.” Owo aari Masu oowooniheriwa. Okathi e...Ti siiso ipwittipwitthi Sawe simmusuwelaaya Owo.

163 Vano nkaaweheni aFarisi n’akina mahiku ale. “Oh,” awo yiirale, “Mulopwan’ola Pelizepuli.” Okathi Owo omuhimenryaawe muthiyana veehimeni, nipuro, mwaha wa itampi sawe, axiia awe owo aarinaawe, okathi Owo omuhimenryaawe Natanayeli nipuro vaaryaawe, mukhitte

mwa mwiri Filipe aamwiihannaawe, mukhitte mwa mwiri wa efiiku, avekelaka, vano, awiixuttihi ale a nihiku nle yiirale, “Mulopwan’ola Pelizepuli. Owo xetwanii. Owo nahakoo.”

¹⁶⁴ Masi khiyaari siiso ni Petru, Yakopo, ni Yohani, akina aya. Awo yaanisuwelasa. Mwaha wa xeeni? Awo yaanisuwelasa wira Muluku aahimnye wira okathi Mesiya aarowaawe orwa, vathi va nsu n’owuupuxeriwa na Moise, wira Owo aarowa okhala profeta. Nto okathi awo yoonaly’aya itthu iyo Owo aahimnyaawe wooniheriwa ni okhalihwiwa sooloka voomalela, awo yaahisuwelasa wira eyo yaari yolya ya ipwittipwitthi. Awo yaahisuwelasa wira nle naari nlope. Nto khupaceryasa otthara. “Ipwittipwitthi Saka sinnisuwela,” okhala wira awo yaahoonu Masu a Muluku yooniheriwe.

¹⁶⁵ Vano, atthu olelo, awo khanaamini wira yookhala etthu iyo ntoko opatiisu wa Erooho Yoowaarya. Murwe nno wala nipuro nlo awo arinaaya Erooho Yoowaarya, ni animoonaya natiri a Muluku amaliheriwaka oratta-ene, vano, “Ipwittipwitthi Saka sinniwa nsu Naka.” Awo annisuwela oruma wa nlope nlo okhala wira owo Bibiliaa. “Yesu Kristu mmosaru nsana, olelo, ni mahiku othene.” Owo nlelo ti aHeperi 13:8, vekeekhai.

¹⁶⁶ Miyo khenikicala, vano, khenivirikana mapettha makavi ekereja enrumihaaya. Nihaana mapettha manci-ene a ekereja, moosuwela, anrumiha sothene, yiiraka, “Oh, mahiku a miiriirya aamala. Khekhanle etthu iyo ntoko ovoniha wa Muluku.”

¹⁶⁷ Oh, ipwittipwitthi s’ekeekhai khasiniwelela yeeyo. Masi iyo siniwelela nlope nlo, nle noolipaneya.

¹⁶⁸ Nipettha nlo na ekereja naamuwerya orumiha etthu. Nyuwo khino. . . Nkawehani etthu arinaaya olelo, mapettha a mukereja. Mmosa onthimakela *nno*, ni mmosa onthimakela *iwe*. Nto xetwani onookilaathi amumulaka, airaka, “Nkoonani, awo anwana yaaworu. Ti yeeyo tu. Hata nkirina yo ottikinya ntata naka.”

¹⁶⁹ Masi, munna, mwaahiye awo othene alattuliwe, etthikele sooruma sa mukhulupale. Oh, wulu! Vano munoorowa woona “hayani, anakhotto aKristu,” ekeekhai, muhiwiriyanaka mapettha, masi mwiiwelelaka nlope.

¹⁷⁰ Nrowe neemele paahi, minuutu mmosa paahi, ni nitthikele ottuli niwoone vakhani vano. Nihanle omaliha, okhala wira nkinthuna woopisihani va okathi munci-ene. Masi nitthikele ottuli niwoone kamosa-kamosa yaaiwale nlope nenla. Nikuxe. . . Ni awo yaahikhalana olipa. Vano, miyo koowoonihani wira itthu sothene sikina ti soohisuwanyeya. Nrowe nimukuxe mutthu mmosa a khalayi paahi, okathi vakhani.

¹⁷¹ Nrowe nimukuxe profeta Yobi. Vano, mulopwan’owo aahivira mowehereriwani, masi aanisuwela wira Muluku aavekela mukuttho woopahiwa. Ti yeeyo Muluku aavekelaawe, ni ti yeeyo tu Owo aavekelaawe. Ni khivaacala moota xeeni

ehasara yaakhumelelaaya owannyawe...Muluku kweekwe khoni...

¹⁷² Moona etthu yiireyaka voohiloka wa mutthu, eyo khenihimya wira owo onoomaniwa ni Muluku. Pooti ohikhala wira owo ori ota wa otthuna wa Muluku. Owo onnisuwela mmurimani mwawe vakhala wira onwiriyaana nlope wala nnari.

¹⁷³ Muluku aavekela mukuttho yoola woopahiwa, ni Yobi aaheemela oolipa mwa yeeyo. Ti yeeyo tu. Awo khwira, “Yobi, nyuwo mwa natampi a wiphiini. Yookhala muniiraanyu yoonanara.” Masi owo aanisuwela wira khayaari siiso. Owo aahikhala vaavale, okhala wira aahiiwa oruma wa nlope, vano owo khukhala vaavo vene ni nenlo.

¹⁷⁴ Nto, vookiserya, wookiseryani wene, okathi owo waary’awe...Xetwani aataphuliwaawe wa yoowo, khukuxa emusi awe, ni khwaakuxa an’awe, khukuxa ikhamelo sawe, khukuxa muhakhu awe wothene, khuhonona ekumi awe ene. Owo aahikilaathi vanikutthani v’ettuura. Yaakhala ntoko itthu sothene saahirowa. Masi owo nnakhala vo iirale, “Miyo koosuwela wira Nvuluxa aka ookhala. Mahiku ookiserya Owo onoovenya elapo ya vathi. Hata axiitthu epwetexaka erutthu ila, nlelo n’erutthu aka kinoomoona Muluku.” Khiyaakhanle etthu yoohisuwanyeya wa yeeyo, yaahikhala? Kahi, “Miyo—miyo—miyo—miyo kinooona wira Owo mwa enamuna emosa ookhala.” Owo aairale, “Miyo koosuwela wira Owo ookhala, ni Owo onoovenya mahiku ookiserya mulaponi. Hata axiitthu epwetexaka erutthu ila, nlelo n’erutthu aka kinoomoona Muluku.” Oh, wulu! Yaahiiranya. Owo aari oolipa saana.

¹⁷⁵ Abrahamu, eettaka vapuwani nihiku nimosa, aahimwiiwa Muluku wira, “Abrahamu, Miyo kinrowa...” Owo aahikumana ni Abrahamu ahinatthi okhalana Masu oolempwa, nto Owo khwira, “Abrahamu, Miyo kinrowa woovahani mwaana ni mwaar’inyu, Saara.” Vano owo aarina miyaakha miloko mithanu na mosa ni mithanu okathi uwo, ni Abrahamu aarina miloko mithanu na miili ni mithanu. Vano awo yaahiiythhokiherya yeeyo, ni owo khuuleliwa muru ohimya onamoona. Owo aahisuwela wira aamurowa okhalana mwaana.

¹⁷⁶ Ni Bibilia ohimye wira, “Owo khaamuhovenrye natiri a Muluku mwaha wo ohaamini, masi aahikupali voomalela.” Amen. Ookupali voomalela, eyo enihimya wira owo aahimaleliha nuulumo nookiserya. Amen. Ti yeeyo. Nuulumo nookiserya ti wookiseryani w’ephiro. Eyo ti etthu yookiserya. Ti—ti yothene ekhanle.

Owo khwira, “Miyo nkinreere okupali wira, etthu Muluku ohimyaawe, Muluku onniwerya opaka.”

¹⁷⁷ Nyuwo mwa, ohiy’ula, nyuwo mookupali voomalela wira ela Erooho Yoowaarya? Nyuwo mookupali voomalela, wira ela t’ephiro? Nyuwo mookupali voomalela, wira Owo Mpenuxa?

Nyuwo mookupali wira Owo onnoorwa-tho? Nyuwo mookupali voomalela wira Owo mmosaru nsana, olelo, ni mahiku othene? Amen. Ookupali voomalela! Ayo.

¹⁷⁸ Nrowe nimukuxe mukina, Eliya, eemenleene vale vamwaako. Owo aahinyakulihana ni Yesapeli ni owiitho wawe woopintariwa, ni owo aari ntoko oophweeleya mwaha wa yeeyo. Ya moota athiyana othene yaattharaaya ethooneryo ya muhano oopacerya, khino miru suulupale sa maihi n'itthu awo yaarinaaya nihiku nle. Owo aahipwapwela vanci-ene yeeyo mpakha—yaahalelaaya omuriipiha murima.

¹⁷⁹ Voolukama, Muluku khumwiirela, “Rowakani iwe. Moosuwela, nno ennirupa epula ntoko mahiku maili wala mararu, khula esumana. Masi murowe mpakha wa Akhabi, mwamuleele, ‘SIISO ANIHIMYA T’APWIYA. Okame khummora okhuma wirimu mpakha miyo kiihane.” Oh, wulu!

¹⁸⁰ Owo khaahimye wira, “Vano, Akhabi, khino, alakela eyo enoovara muteko siisa.” Oh, nnari. Owo aahikupali voomalela, khuwaakhanle ohisuwanyeya. “Okame khummora, ipula khasinrowa orwa, mpakha miyo kiihane.” Amen. Ovuwa! Oh, mwaha wa xeeni? Owo aahiwa nlope. Nlo naari noolipaneya. Owo aanimusuwela Muluku awe. Owo aahisuwela etthu, okathi Muluku olavunly’awe Masu awo, erimu yothene n’ilapo ya vathi saanvira mpakha awo—awo wiiraneya, yaahaana wiiraneya. Owo vekeekhai aahikupali.

¹⁸¹ Vano Owo khwira, “Eliya, kintthuna wira murowe nipuro noowuumaxa mulaponi, mpakha osulu vamwaako weiwo sihikhanle hata miro. Masi miyo kihaana mmosa osulu iwe wa nyuwo.”

¹⁸² Owo aahikupali voomalela. Owo aahiwela vamwaako khukilaathi vakhiviru va muro Kerithi. “Nto vano kinrowa wira exeeni osulu nno?”

“Miyo kihaaruma anakhuku wira yoolyihekeni.”

¹⁸³ “Vano, moota xeeni anakhuku awo. . . Vano, nwehererye minuutu mmosa, Pwiya”? Nnari, nnari. Nlope nooruma. Eyo enniphiyerya. “Enrowa wiiraneya sayi? Miyo nkisuwenle. Nkincala. Munnona? Kuhiyo mwaha aka miyo ovelavela mwaha wa yeeyo. Owo mwaha wa Muluku. Owo aahimye wira ohaaruma anakhuku.”

¹⁸⁴ “Ahe, Apwiya, xontte pooti oleeliherya, ni okisuweliha nipuro awo. . . exikola xeeni anakhuku ale yeentte aya, wira yiixutte olavula eHeperi? Enamuna xeeni ya. . . Awo anaapeyasa vafikawuni ya kaaxi, wala arina mooro wa ikhuni, wala aniirasa sayi? Ni ti vayi anrowaaya. . . Muthinto xeeni wa mwaamunama awo anrowaaya omwiiva? Awo axipalame axikhaani paahi. Awo anrowa okiivela sayi enama, wira ekiruuhele mukatthe wa enama?” Munnona? Munnona? Eyo khiyaakohiwe.

185 Muluku, n—nlope na Muluku, Nsu Nawe naahiruma khwira, “Miyo kiihira!” (Kahi, “Eliya, khino Miyo kinimwiira.”) “Miyo kiihira.” (“Miyo kinimwiira.”) “Miyo kiihira.” Amen.

186 Owo ti Muluku ahu, ohiy’ula. Kahi, “Owo onimwiira.” Owo ohiira. Amen. Owo ohiira. Amen. Kahi, “Owo onimwiira; Enooweryaneya Owo. Alakela Owo onimwiira.” Owo ohiira. “Miyo kihaaruma anakhuku.”

187 Owo oovahererya Erooho Awe w’atthu othene. Owo oovahererya iparakhha Sawe. Owo oowela Wirimu, khwaavaha athu soovaha. Ookhala onrowa waakhela. Ookhala onrowa okhoota. Kuhiyo mwah’aka moota enrwaaya. Ehaana ophiya vale paahi. Muluku ohimye wira yaarowa okhala siiso, ni ti siiso. Petru aahihimya, Nihiku na Pentekosite, “Murukunxe murima, khula mmosa a nyuwo, mpatisiwe ni Nsina na Yesu Kristu wira muleveleliwe itampi sanyu, nto munimwaakhela yoovaha, Erooho Yoowaarya.” Enrowa orwa sayi? Miyo nkisuwende. “Na—natiri t’awaya an’inyu, awaya ale ankhala ottaiwene, othene ale Apwiya Muluku ahu anthhun’aya owiihana.” Vano, khimwaawerya oleeliherya eyo. Nlope nooruma, ni miyo kinnaamini. Miyo kihiiwelela, ni kihaakhela. Amen. Vano mweererye okikupaliha voovirikana yeeyo emara emosa. Amen. Oh, miyo nkiihiyo ooloka voomalela. Nnari.

188 Ntoko ohiyu ule, munna mmosa muthiyana mutokweene ooriipa, owo iirale, “Humu, kihimyeke onamoona?”

“Ayo, muthiyana.”

189 Owo khwira, “Miyo kintthuna kihimye ela.” Owo khwira, “Miyo—miyo—miyo nkiihiyo ele entthunaaka okhala.” Ni khwira, “Miyo nkiihiyo ele entthuneya wira kikhale. Masi, yookhala ethu emosa ensuwelaaka, nkiihiyo ele kaaryaaka.”

190 Tivo, siiso, siiso t’inamuna sinoonaahu vano. Miyo nkiihiyo ele kaaryaaka, okhala wira kihoopowa ohiy’ula, ni mahala a Muluku, ni kihaakhela opatiisu wa Erooho Yoowaarya, mwa orummwa. Eyo emwaraxiwe iwe Nihiku na Pentekosite, natiri oovahiwa, ni miyo koomwaamini. Hat’etthu yoohisuwanyeya. Miyo kihiiwa nsu. Miyo kaahiiwelela, ni miyo kookupali wira ti yeeyo. Vekeekhai. Koosuwela wira ti yeeyo. Vekeekhai.

191 Simeyoni, musuweli humu oophiyaka miyaakha miloko mithanu na miraru, miyaakha imiya sene okhuma okathi profeta aaryaawe mulaponi, masi aaneettaka mapuro othene ni nttittimiho muulupale. Erooho Yoowaarya yaahilavula ni yoowo nihiku nimos, khwira, “Simeyoni, moosuwela, khamunrowa okhwa mpakha woona woopola w’Apwiya.” Ovuwa!

192 Alakela namukuttho muulupale, aahittikittha ireru sawe imaara kamosa-kamosa, khwira, “Simeyoni, mwaahaana ovasa ireru sanyu epantte ekina.”

Owo khwira, “Eyo khenvirikana hata vakhani.”

“Munsuwela sayi wira mookhalana exariya?”

“Erooho Yoowaarya ekileenle siiso. Miyo nkinikhwa.”

193 “Vano, Simeyoni, vano, nyuwo moo . . . Vano, moolikana wira mukhwe naanaano va.”

194 “Oh, nkincala etthu munihimyaanyu. Masi Muluku ookileela wira miyo nkaarowa woona okhwa mpakha koone woopola Wawe. Hat’etthu yoohisuwanyeya. Miyo nkinikhwa. Nkikhanle woonaka okhwa mpakha kimoone Yoowo.” Amen. Ti yeeyo.

“Munrowa wira sayi, Simeyoni?”

“Miyo, owo kuhiyo mwah’aka.”

“Ori vayi Yoowo, Simeyoni?”

“Miyo nkisuwenle.”

“Munsuwela sayi wira munoorowa omoona?”

195 “Muluku ohimye siiso. Ti yeeyo. Awo Masu. Nkinrowa okhwa mpakha omoona Yoowo.” Oh, wulu!

196 “Oh, mutokweene oohaawa. Vekeekhai, owo oovahuwa, moosuwela. Tivo mmuhiye meekhaawe paahi.”

197 Masi owo aahimoona, khula enamuna. Ayo, mulopwana. Muluku onnaapakela ephiro atthu ale anrowa okuxa Masu Awe.

198 Yesu, okathi Owo aaryaawe muumu elapo ya vathi, ni Owo aaphwanyaneya vale vamahiye va Lasaro.

199 Wala, eyo ehinatthi, okathi Owo aary’awe alavulaka n’a—n’atthu, alavulaka moota Owo, onaamwi ahaarina miyaakha miloko mithanu, ni khwira wira Owo aahimoona Abrahamu. Munnoona moota Owo aaryaawe oolipa? Owo iirale, “Abrahamu ahinatthi okhala, MIYO KOOKHALA. MIYO KOOKHALA.” Kahi, “Miyo kaari,” wala, “Miyo kinookhala,” masi, “MIYO KOOKHALA. Miyo koolipa.”

200 Vano, Owo aahihimya, vamahiye va Lasaro, Owo ahinatthi orowa iwe, Owo iirale, aahimuhimeerya Marta, Owo iirale, “Miyo ki ohihimuwa, Ekumi.” Kahi, “Miyo kaahaana okhala,” wala, “Miyo kinookhala,” masi, “Miyo ka yeeyo.” Amen.

201 “Murokor’aka, Nyuwo mwaari vaava, khaakhwa. Masi hata naanaano va, Pwiya, sothene Nyuwo sintthunaanyu onvekela Muluku, Muluku onimoovahani.”

Owo khwira, “Murokor’inyu onoohihimuwa.”

202 “Oh, owo onoohihimuwa mahiku ookiserya, woohihimuwani w’atthu othene. Owo aari mmiravo ooreera murima. Ayo, kookupali wira owo onoohihimuwa.”

203 Masi Yesu aahiisookolela vakhani, mmansawe, khwira, “Masi miyo ki ohihimuwa ni Ekumi.” Kahi, “Miyo kinookhala; Miyo kihaana okhala,” wala siiso. “MIYO KOOKHALA.” Khiyaavo etthu vo, khiyaavo etthu yoowaanyiherya,

yoottikinyeya ya yeeyo. Khiyaavo etthu yoohisuwanyeya. Yaari yoolipa.

204 “Miyo ki ohihimuwa ni Ekumi. Ole onikaamini Miyo, hata onakhwaaru, onookhala mukumi. Ole orina ekumi ni onikaamini Miyo khankhwa-tho.” Kahi—kahi, “Awo khino nnari. Awo khino khanrowa okhwa.” “Awo khanrowa. Hat’etthu—hat’etthu yoohisuwanyeya wa yeeyo. Awo khankhwa.”

205 “Ole oniiwa Masu Aka ni onimwaamini Ole okirumme ookhalana Ekumi ehinimala, ni khonrowa hata orwa Woolamuliwani, masi oovira mookhwaani khuphwanya Ekumi.”

206 “Khino Awo khanrowa orwa Woolamuliwani”? Awo khanrowa orwa Woolamuliwani. Amen. Owo ookuxa Olamuliwa waka. Miyo nkirina-vo etthu vo. Amen. Eyo vo. “Oovira mookhwaani khuphwanya Ekumi.” Oh!

207 Vano owo khwira wira aanaamini. Vano, Yesu khaahimye wira, “Ahe, nyuwo moosuwela, okhalaka wira munnaamini yeeyo, ni moosuwela wira Miyo ka Masu, ni—ni Miyo—Miyo. . . Nyuwo moosuwela wira Miyo ka Yoole aathuna orwa. Nyuwo moohimya yeeyo. Munnaamini. Miyo kinimooleelani etthu naakhanlyaahu wiiraka. Naathukumanye mahumu vamosa, nirowe noone khama ninoowerya wira etthu wa yeeyo.” Nnari, nnari. Owo iirale, “Miyo ki. . .” Kahi, “kinoorowa *koone* khama kinoowerya omuhihimuxa.” “Miyo kinoorowa kaanvenxe.” Amen. Kahi, “Kini—Kinimwehererya.” “Kinimwiira.” Hat’etthu yoohisuwanyeya. Nlo khinaari nsu noohisuwanyeya, okathi Owo aairalyaawe, “Miyo kinimwiira. Miyo kinimwiira.”

208 Nto Yoole ohimye wira, “Miyo kinimwiira,” ohoomanelani natiri. Aleluya! Oh, wulu! Amen.

“Miyo kinoorowa kanvenxe.”

209 Emaara ekina Owo iirale, “Mpwxakase emp’ela, nto kinimoona ekhanlyaaka wiiraka mwaha wa yeeyo”? “Mpwxakase emp’ela, nto Miyo kinooteka-tho muhina mwa mahiku mararu.” Hat’etthu yoohisuwanyeya. “Vano kinimwehererya. Nyuwo othene mweemele wa moone khama kinoowerya wira wala nnari”? Ah, nnari. “Miyo kinoovenxa.” Hat’etthu yoohisuwanyeya. “Miyo kinoovenxa. Nyuwo—nyuwo mpwxakase; Miyo kinoovenxa.” Oh, wulu!

210 Mwaha wa xeeni? Owo aanisuwela wira Owo aari Mutthu yoole, mwa Yoolempwa, Davidi aamuhimalyaawe. “Miyo nkinihya munepa Awe mookhwaani, nnakhala nkinthuniherya Oowaarya Aka wuntta.” Ni Owo aahisuwela wira aahiheliwa mwa natiri ule a Soolempwa, vano tivo Owo aari oolipa.

211 Vano, hiyo khanikhanle okhalaka oolipa siiso? Hiyo nimmukhaliha Yoowo, ethoonyeryo, wa itthu sikina. Vakhalaru wira Masu a Muluku ahimye yeeyo, khivanweryaneya hiyo okhala oolipa wa Masu ntoko Owo saaryaawe wa yeeyo?

212 “Miyo ki ohihimuwa ni Ekumi.” “Miyo kinoohihimuxa.” Amen. Mwaha wa xeeni? Owo aahisuwela wira Masu yaahihimya, ni Owo aahikupali wira aamuhihimuwa.

213 Miyo ka mutthu yoole iwe mwa Yohani 5:24, “Ole oniwa Masu Aka ni onimwaamini Ole okirumme, ookhalana Ekumi ehinimala, ni Miyo kinoomuhihimuxa mahiku ookiserya. Owo khonrowa Olamuliwa; oovira mookhwaani khuphwanya Ekumi.” Awo—awo ti hiyo. Nto ninoova exeeni? Exeeni eniiraneya?

214 Encala exeeni maarakha murinaanyu? Nyuwo muniisihana mmansinyu *ela, ele*, wala *ekina*. Hiyo n’ana a Muluku, ni mahala a Muluku. Hiyo noosarihiwa ni Erooho Yoowaarya, ni mahala a Muluku. Envirikana exeeni vakhala wira *ola t’ule* wala *ole*, vakhala wira owo Prespiteriyaano, Mmetotista, muPatista? Vakhala wira owo t’osareya Erooho Yoowaarya, ookhalana Ekumi ya ohihimuwa mwa yoowo. Amen. Ayo. Vano, Nihiku na Pentekosite . . .

215 Yesu aahaahimeerya, mwa Luka 24:49, “Moone, Miyo kinimooveleeliheryani natiri.” Kahi, “Khino kinimwiira. Kinimoona etthu ekhanlyaaka wiiraka mwaha wa yeeyo.” “Miyo kinimooveleeliheryani natiri a Atithi Aka mwa nyuwo. Masi murowe muttethe w’oYerusalemu mwalipelele mpakha mwaakhele owerya.”

216 Vano, ankh i awo yaalipelenle, ntoko wira, oh, mahiku mathanu na mosa, yaairale, “Ninlipelela exeenii? Kookupali wira nihaana okupali mwaha wo waamini. Khamunuupuwela siiso?”

217 Ankh i Yakopo aahimye wira, ni—nihiku na neethanu neexexe, airale, “Simoni, murwe va minuutu mmosa. Moosuwela, nihiku nlo kaahikhalana moonelo mmosa w’omeekha. Munnona? Nto nyuwo moosuwela etthu enaamini aka? Miyo—miyo—miyo kinnaamini wira Owo khontthuna wira nilipelele vaava. Miyo kookupali wira hiyo niha—hiyo nihaakhela. Nyuwo khamunuupuwela siiso? Nrowe nikeleleke ohoolo ni muteko ahu. Nrowe nikeleleke ohoolo ni muteko ahu?” Oh, yaamwiira ehikhumelenle.

218 Mwaha wa xeeni? Awo yaanisuwela wira profeta aahihimya. Vano nwiriyane. Profeta aahimye wira, “Nikano vasulu va nikano, yooruma ehaana okhala vasulu va yooruma, vasulu va yooruma; vakhani va ni vakhani vale.” “Nvareleke ele eri yooreera.” “Maana kinimwaalavulela atthu ala ni moolumo ookukuma ni ilavulelo sikina. Nto nno ti omumula, esabbath.” Awo yaahisuwela wira etthu yaahaana wiiraneya okathi Eyo jaarwiiy’aya.

219 “Miyo kinoomwaraxa Erooho Aka mahiku ookiserya.” Yoweli 2:28, “Enimwiiraneya mahiku ookiserya, onihimya ti Muluku, Miyo kinimwaamwaraxela Erooho Aka atthu othene,

ni an'inyu alopwana n'athiyana anoolavula s'eprofeta. Nave-tho kinimwaavaha arumeyi Aka alopwana ni athiyana Erooho Aka, nihiku nlo. Miyo kinimooniherya ithoonyeryo wirimu osulu ni—ni vathi, ni mooro, ni mwiixi, nnikupethe.”

220 Awo yaanisuwela wira waahaana okhala musuwelelo mmosa waarwa vamosa ni Erooho Yoowaarya. Awo khiyaarowa waakhela nsu noohisuwanyeya. Masi okathi voonansaaya wira etthu iyo yaaneetteetta, ni khoona eyooniheryo ya Bibilia yeettaka ni yeeyo, mwa awo khuwaakhanle ohisuwanyeya. Awo yaahikhumasa elukamaka mphironi. Mukilevelele. Oh, wulu! Awo yaahikupalisa wira yaari Erooho Yoowaarya.

221 Nyuwo moosuwela olipa sayi awo yaarisaaya? Mpakha, Petru, mutthu uwo mwaamukhaani oohisoma, atuphenlyaawe vasulu va nttoro ahiiso ekaaxa, wala nipuro nlo, khwira, “Nyuwo atthu a oYuteya,” ekuuku yookhuma ntoko muthupi mwaamukhaani. Owo khwira, “Nyuwo atthu a oYuteya, nyuwo munkhala oYerusalemu! Miyo kaaniwoovani, okathi vakhani ovinre; vano, nkniwoovani. Musuweleke ela, ni mwiiwelele moolumo aka. Ala khahapalasiwe ntoko sinuupuwelaanyu. Masi ela *ti Yeele*.” “Hiyo *ninroromela* wira ela *ti Yeele*”? “Hiyo *ninnaamini* wira ela *ti Yeele*”? Owo aairale, “Ela *ti Yeele* yaahimmwe ni profeta Yoweli.” Aleluya! Khiyaavo yoohisuwanyeya wa yeeyo. “Ela *ti Yeele* yaahimmwe ni profeta Yoweli.” Oh, wulu!

222 Yesu oohimya, mwa Marku 16, ooruma Ekereja Awe, “Murowe mulaponi mothene, mwalaleye Ehapari yooreera.” “Ithoonyeryo iya khino sinimwaatthara; sinimwaatthara, imaara kamosa-kamosa, khino”? “Iyo sinimwaahoola ale anaamini. Ithoonyeryo iya sinimwaatthara ale anrowa waamini. Mwa Nsina Naka awo anoowoomola axetwani. Anoolavula ilavulelo isya. Yavara enowa wala yawurya etthu eniiva, kheniwiiriha yootakhala. Awo yawiixaatherya matata aretta, awo anoopenuwa.” Kahi, “Khino.” “Awo anoopenuwa. Ithoonyeryo iya sinimwaatthara ale anrowa waamini.”

223 Mukihiye kikhuveihe vakhani, kihimyaaka ela, munna mulopwana, muthiyana, minuutu vakhani sinttharelana. Miyo kinnaamini. Miyo kinnaamini wira sothene sikina, etthu p'itthu eri yoovirikana ni Yeeyo, kehiyo yooloka. Miyo kinnaamini, wira itthu sothene siri soovirikanyiha Eyo sinoomora. Kinnaamini, nkincala ikomunismu kavi, wala siri kavi ismu *iya* ni ismu *iye*, ni onankerejani, ni Romanisimu, ni sothene sikina, owAameerika ni itthu sothene sikina sinoomora.

224 Masi Masu awo anookhala Voohimala, okhala wira Awo Masu. Nto nihinatthi okhala Nuulumo, ohaana okhala muupuwelo. Vano nuulumo muupuwelo woolavuliwa. Ni Muluku, mwa Ohimala, eyo yaahikela mmuupuweloni Mwawe.

Owo aahooniherya miyuupuwelo Sawe. Iyo khukhala Masu, ni Masu ahaana wooniheriwa.

²²⁵ Tivo, okathi Owo aalavunlyaawe sa Mesiya, aahaana orwa Mesiya. Owo aahilavula wira yaamukhala Ekereja mahiku ookiserya, yoohikhalana nlepa wala ninnyaari mwa yeeyo; enookhala Ekereja. Aleluya! Owo aairale. Miyo kinkuxa Masu Awe. Miyo kinnaamini.

²²⁶ Miyo kinnaamini wira Owo oomulaiherya Erooho Yoowaarya khula mulipa-oowaamini aarowa waamini. Miyo kinnaamini wira Petru, Nihiku na Pentekosite, okathi aalaleiyaawe ehapari ile yoosuwanyeya, khwaahimeerya othene aya wira arukunxe murima epatisiwe, wira ithoonyeryo iya saamoowa, ni *yeela*. “Othene ale anrowa ovekela mwa Nsina n’Apwiya yaamoopowa.” Miyo kinnaamini wira eyo Ekeekhaii; kinimweemererya yeeyo. Miyo kihoona eyo wooniheriwa.

²²⁷ Koosuwela wira kinoowana mwaha wa yeeyo. Ni koosuwela wira kimphavela opaka nivalo. Kihinatthi waavula nivalo, kihaana othikila khula evitikelelo, khula nlaxi nikithi, sothene sikina, wira kikumihe mphironi. Masi khula okathi munookolaanyu nivalo, munikelela ohoolo. Amen. Mukuxe mwaalo paahi muthikile.

²²⁸ Anci-ene a nyuwo munnimuupuwela Paul Rader, mpatthani oothamaleya. Miyo kaari mulaleyi mmiravo paahi, mwaana. Miyo kaanirowaka oFort Wayne, omwiiwa, oRediger Tabernacle. Mutthu muulupale saana! Owo aamukhala otuli, aamuweliha ekalsa awe, ovenxa ntata nawe ni otturuma ntoko ekhaya, nto miyo koonaka wira aarowa otupha vapulpitu. Okathi owo. . . Vano owo aamupacerya ni yoosoma, ayo, mwa Maphattuwelo, ni omalela mwa Wiisuupulula, nno ni nno. Paul aari mutthu oothamaleya.

²²⁹ Alavulaka nihiku nimoso, owo iirale, “Miyo kaari nakhuni Oregon,” aaryaawe a weiwo. Khwira, “Nihiku nimoso, moosuwela,” owo khwira, “Miyo—miyo kaari mmapuwani mwa misawu, nipuro nlo.” Miyo kinooliyala vano nipuro naaryaaya. Nto owo aavara muteko w’omisionaariyu.

²³⁰ Owo aanimwaamini Muluku, aanaamini ovoniha wa Muluku. Nto Paul khwira, wenzo nno vaavo ekereja ya molumwenkuni eryaaya olelo, owo khwira, “Kaatumihenrye-ru mutthaka aka wa mahala aPentekosite ooviha, ohiya wira ele miyo kiiralyaaka va ni nyuwo nikhuru,” khwira, “khukiruuwela oxanka, khuphiyerya nipuro nookhalana itoolare ikonto vaara ikonto sene sa olokihiwa. Kaahixanka mpakha okiphwanya kankuru, nto kinookhwa vano. Kaatumihenrye-ru mutthaka aka wa mahala aPentekosite ooviha, Muluku aamukireeriha vanci-enexa mwaha wa yeeyo.” Ekeekhai.

²³¹ Khuhimya wira aahikhala iwe mu—mutakhwani, ni khuphwanya ehooma ya maasi ooriipa wala etthu siiso. Yaari

yoowoopiha. Ni owo aari ottaiwene saana mutakhwani, ni mulipa-oowaamini voolipa ovoniha wa Muluku. Nto owo ohimye wira aahiwereiwa ni owereiwa. Owo aahivekela, khuvekela. Nto amosa-amosa wa mamisiyonaariyu khuhimya wira yaarowa okuxa mwaatiya yamphwanye meetiku. Vano, yaamukuxa mahiku wira emphwanye meetiku. Nto owo khwira, “Miyo—miyo. . . Muhiire. Muhiye siiso.” Khwira, “Muluku aahikivonihe, nto kinoorowa Owaani.”

²³² Nto khuhimya wira amwaar’awe yaahikhala mpaani ni yoowo. Khutthikela oriiipelaka oriiipelaka. Ni khwira wira owo aahiwiiana amwaar’awe, khwira, “Oophentiwa, nvarele ntata naka.” Khwira, “Mukhale mukivekelelaka paahi. Onooriipela vano.” Khwira, “Miyo—miyo kinnaamini wira miyuuttutthi sinoomora sikirukureryaka.” Owo khwira, “Nvarele. . . Nvarele ntata naka paahi nvekele, kirowaka.” Owo khwiitthokiha, wira akumane ni Muluku.

²³³ Owo khukela mwa etthu ntoko ohileya. Ni owo khwira wira aalonhe wira aatthikenle wenno Oregon, ntoko mmiravo, othikilaka matoro. Ni khuhimya wira mukhulupale a vapuwani aairale, “Paul, nwele nno epanthe emosa ya ntumuxa, kihuuha mwiri mmosa, munnuwelo khata.”

²³⁴ Owo khuhimya wira aahitthimaka ni metto sawe s’emiravo, khuuha mwiri uwo, khuvakulela, ohomeeryaka epaso. Khwira moota piinyu uwo oowoolowa, epaso awe, yoowiitha yuulupale, ya oreere miili yaakenlyaaya mpiinyuni vooreerela. Ni khwira wira aaroovara, khuupuwela, “Ahe, miyo kinootthepa kikhuruwelane ntumuxa.”

²³⁵ Mulopwana mmosa, muulupale a ikuru, khwira, “Kaaniixuttaka moota wootakanxa makutha aka, ni ovenya ni ettuli aka, nipuro nuulupalexa na mutthu.” Aahikhalana mitika ottuli wawe ni mmakhatani, ottuli wa metto sawe. Khwira, “Miyo kaamutthepa nttoro nimosa nuulupale,” khwiipweherya vanikhatani wawe, ni weetta. Masi khwira, “Nle naari nttoro pure paahi, masi,” khwira, “Miyo paahi. . .” [Munna Branham ommana mikrofooni—Mol.] (Kileveleliwe.) Khwira, “Miyo nkaawerya ottikinya ottoro nlo tu.” (Kileveleliwe.)

²³⁶ Owo khwira, “Vekeekhai nkaawerya ottikinya ottoro nlo.” Owo khwira, “Khwiilipiha, khwiilipiha kiphavela otthepa, nave nkaawenrye tu.” Owo khwira, “Miyo kaahikumiha ikuru saka sothene mwa miyo.” Owo khwira, “Nkaawerya ottikinya nttoro nle.” Ni khwira, “Vookiserya, kikhala ootteettheya saana, kikilaathi paahi kiphiteerya mwiri kipacerya wuukuttha oviheriwa. Kaari othene ookhulumuwa.”

²³⁷ Ni khwira, “Nuuvira okathi vakhani, kaahiiwa nsu na mukhulupale aka.” Masi khwira, “Nlo naari nsu noomaaleleya kitonko aka wiiwa.” Ni khwira, “Okathi orukununwaaka, nsu nimosa khukihimeerya, ‘Paul.’ Nto miyo khwira, ‘Ayo,

mukhulupale, exeeni?’ Khwira, ‘Munwanela-ni ni nenlo?’” Owo khwira, “Ahe, nyuwo mukirumme wira kiruuhe vapuwani, ni miyo koomalamala, ni nenlo. Miyo paahi—miyo nkinwerya tu wira, mukhulupale.’ Owo khwira, ‘Paul, khamunoono muro ole wa maasi onivira *vale*?’ Khwira, ‘Ayo.’ Khwira, ‘Muro ole onrwa mpakha opuwani. Muhinihelela-ni mmaasini tu, mutuphela muneettiha murowaka opuwani?’ Khwira, ‘Miyo nkuupuwenle eyo.’”

²³⁸ Vano owo khupirikixela mmaasini, khutuphela vaavo, khwira, “Oh, wulu!” Khupacerya omana maasi, ni otupha, ni onyakula, aituperyaka, aviraka mmawipini, ni akhuruwelaka mmaasini, sothene, eettihaka nntoro nla, akhuruwelaka, akhuwelaka, “Miyo kinimweettiha! Kinimweettiha!”

²³⁹ Owo khwira, etthu yoopacerya, owo khwiithikela, owo aaphanyaneya vale varyari ya vathi, ni amwaar’awe ekhuwelaka ni yoowo. Owo aanikhuwela, “Miyo kinimweettiha! Miyo kinimweettiha! Miyo kinimweettiha!” Axinna!

Maloko anoophweeyasa, Isarayeli onoovenya,
Ithoonyeryo Bibilia ohimyaawe khalayi-ene;
Mahiku a Amalapo t’owaalakeya, ni oosareya
woova;
“Mutthikele, yawinyu, O oomwaramwareya.”

²⁴⁰ Mutthak’ola wa Masu a Muluku ti Ekeekhai. Okhala wala okhwa, miyo kineetta mwa Yoowo. Miyo nki... Nkinnyakulihanaka ni Yoowo. Nkineererya onyakulihana mwaha wa Yoowo. Miyo kirimwaakhela paahi, nto Miyo kineetta mwa Yoowo. Mwaahiye alipa-oowuulumela avenye. Kinoovira khula muro. Miyo kinookela vapuwani, nihiku nlo, kiwenle-ene vasulu va Masu a Muluku. Amen. Kookupali wira kinoophiya iwe.

Nivekele.

²⁴¹ Xeeni nyuwo otthepaka muritti wa etampi? Xeeni nyuwo okhalaka mukhalelo muryaanyu, muhinsuwelaanyu veemenly’anyu, mutthimakaka okhuma ekereja ni ekereja, ni okhuma nipuro nnipuro? Muhinrihelela-ni paahi, vamwiikimanyo, ohiy’ula, ni weettiha vasulu va Masu? Muhinimukuxerya-ni paahi natiri a Muluku ohiy’ula mweettihaka munarowa ottaiwene wa evitikavitika, mpakha osulu wuulupale wooripelela, wowooneela siiso? Muhiwanane Owo. Muhixanke mwaha wa Yoowo. Mwaamini Yoowo paahi, mmukupali. Ola Omwene ohikhanle ottikinyiwaka. Mweettihe vasulu Vaya.

²⁴² Mwaawereiwaka ohiy’ula, mmukuxe natiri a Muluku, “Miyo k’Apwiya kinvonihia iretta sanyu sothene.”

²⁴³ “Kinrowa okhala sayi mukumi, Munna Branham? Meetiku oniira kirina eretta ya murima, kirina kankuru, kirina *ela, ele,*” khula etthu, “Miyo nkiniiwa, nkinlavula. Nkinoona,” khula

etthu. Evirikanne exeeni? Mmukupali natiri a Muluku paahi mweettiheke vasulu va Yoowo.

²⁴⁴ Nrowe nikuxe ekopo yuulupale, nikelihe va, ni nilepe vasulu vaya, “Mavekelo a waamini aavekeliba ohiy’ula; kinrowa weettiha vasulu vaya. Bibilia ohimye wira, ‘Mavekelo a waamini anoomoopola mureta, ni Muluku onoomuvenxa. Aira etampi, onooleveliwa.’ Miyo kineettiha vasulu vaya. Kinnaamini.”

²⁴⁵ Mwaairale-ene yootakhala, mwaakhanle-ene ottaiwene ohiy’ula, “Ole onikhuwa etampi awe itthu kinimweettela saana. Masi ole onihimya itampi sawe onoomoreliwa ikharari.” Muhinihimyela-ni?

“Ahe, kiireke exeeni, Munna Branham?”

²⁴⁶ Mulape, nto mweettiheke vasulu va yeeyo. Muluku ohimye siiso. Eyo enimookumihani naanaanoru mutampini mwanyu.

²⁴⁷ Ookhala mutthu ene owo va ohiy’ula, ohinatoko ohela nrromelo aya wa Muluku wa woopoliwa wa munepa awe, ni mwaattuna wira muupuveliwe mmavekeloni okathi onimalihaahu? Munnitthuna ovenxa ntata paahi, mwiire, “Mukivekelele, Munna Branham. Kintthuna kiihuluxe ivelavelelo saka.” Muluku ooreeriheni. Muluku ooreeriheni. “Kintthuna kirihela...” Muluku ooreeriheni, muhano. “Kintthuna kiihuluxe ivelavelelo saka.” Muluku ooreeriheni, munna. Muluku ooreeriheni ottuli iwo, mulopwana. Muluku ooreeriheni, mwamuthiyana. Vaareera. Ti yeeyo. Muluku ooreeriheni. “Kintthuna kihela ivelavelelo saka wa Yoowo keettiheke vasulu va natiri Awe vano. Miyo kinnaamini wira Owo oohimya, ‘Ole onrwa wa Miyo, Miyo nkinimurihela ota hata mano.’”

²⁴⁸ “Kahi moota sinoonaaka, ‘Miyo kaahivekeleliwa nsana ohiyu, Munna Branham; nkinooona saana.’” Eyo kherina naata n’iyo. Miyo kineettiha vasulu va miyoonelo saka. Miyo kineettiha vasulu va Masu Awe. Owo natiri Awe.

²⁴⁹ “Munna Branham, kinnikhalaka waltaari, imaara xexe wala thanu, kiphavelaka waakhela Erooho Yoowaarya. Nkinatoko waakhela Eyo.”

²⁵⁰ Eyo khenihimya etthu. Mukhale vanttoroni paahi, nlo nnimooruuhani olukama vapuwani, vapuwani va Mwaana Oopacerya, vapuwani v’atthu oowaarya. Munoophiya iwe. Mukhale vanttoroni vanyu paahi, munyakule ni mukhuwele mittotopelo sa Muluku voviilipiha ntoko sinweryaanyu. Eyo t’inamuna yo wira.

²⁵¹ Nuuramme-ene muru, vekeekhai munnitthuna weettiha vaavo? Vano, etthu iyo yaamukhaani enootekenyani vamurimani vanyu, munnitthuna orwa va weemela ohoolo waltaari minuutu

mmosa ni onitthuniherya ovekela ni owiixaatheryani matata? Naamutteeliwa murima nyuwo orwa.

²⁵² Nrowe nikuxe etthu ile yaamukhaani eheliwe vamurimani vanyu ohiy'ula, ni yiirale, "Moosuwela, moovonya. Vano nvenxe ntata." Vaareera.

²⁵³ Nyuwo muhookolela mwetto vanttoroni, nttoro na natiri Awe; mwiri, mwiikimanyo waathikilasiwe. Mpatikhe mwiikimanyo yoola vano. Murwe ohoolo nno mwiire, "Vano kinrowa owela keettihe. Naanaano va kinrowa waamini. Kinrowa okupali. Kinnaamini. Nkinkhalakhala kirukunuwaka. Miyo kinrowa okhala oolipa ni Masu awo, mpakha ela olipiheriwa. Nto nuumala eyo olipiheriwa, kinrowa wookola kiwele v'ekina, kipacerye weettiha vasulu vaya." Munnona?

²⁵⁴ Ni nuulumo ti nuulumo, nivalo nnivalo, munookuxa sothene Muluku oolaihenryaaweni. "Okhala wira sothene sinniweryaneya," wa ole oneettiha vale. Onrowa weettiha vasulu va natiri Awe, maana ti yookupaleya wira enimooruuhani vapuwani. Eyo enimooruuhani Ohoolo wa Muluku.

²⁵⁵ Munnitthuna orwa vano nirine-ene muru woowuurama? Ni kinnimwiihana khula mutthu onttthuna weemela waltaari, okathi vakhani paahi wira nivekele.

²⁵⁶ "Miyo kineettiha vaavo, Pwiya. Pwiya, kinnaamini. Ohoverya waka wothene woovithiwa vephattuweloni. Pwiya, miyo kinnoorwa. Miyo kinnaamini. Miyo kimpaka nivalo kilukamaka vaMasuni ohiy'ula, ni kinrowa waamini ni murim'aka wothene. Miyo kinookuxani Nyuwo mwa Masu Anyu."

²⁵⁷ Muthiyana mmosa ooreera murima omphwanyaneya va waltaari, wira—wira amulipiherye Muluku wira owo t'axariya. Khamuntthuna orwa nyuwo, nyuwo murina muru woowuurama, ni nvenxale matata, ni muntthuna wuupuweliwa mmavekeloni? Munnitthuna orwa vasulu va? Muluku ooreeriheni. Murwe va paahi. Ti yeeyo. Murwe mweemele va. Mwiire, "Kinrowa weettiha vaavo. Muluku, Nyuwo moommana natiri, etthu emosa yoomana vamurimani vaka, ni kinimoorwa naanaano va wira keettihe vaavo. Ni kinrowa okhala vaavo voolipa mpakha ekiruuhe kilukamaka vapuwani. Miyo kinoorwa keettaka olukama vapuwani v'atthu ooreera murima a Ole a Wirimurimu." Muluku ooreeriheni. Ti yooreera. Murwe naanaano va, nyuwo muntthuna weettiha vale. Siiso muryaanyu, "Siisa siryaaka, woohikhalana y'ohimya."

²⁵⁸ Muupuwele. Nyuwo muniira, "Owo mwirii?" Ayo. Wookhala mwiri wiikitthiwe, emaara emosa, ni wooheliwa—tho oKalvario. Nwele vamwirini vaavo ohiy'ula, ni anatiri a Muluku, Masu yaathomeiwe vamwirini.

259 Miyo kineettiha vaavo. Kinrowa waamini, ni murim'aka wothene. Kintthuna mano kirwe va kivahane ntata n'axinna aka.

260 Muluku ooreeriheni, mwaha wo weemela wanyu woominyala. Kintthuna wira mukhale vaava, okathi vakhani paahi, nivekelaka. Muluku ooreeriheni, munn'aka. Murokor'aka oothamaleya, Muluku ooreeriheni. Pwiya Yesu...?...Muluku ooreeriheni, munn'aka. Muluku ooreeriheni, murokor'aka. "Mukihooolele." Oohooeleni mpakha epantte ekina ya muro.

261 Muupuwele, ntoko murumeyi a Kristu, miyo kinthokorerya olaleya Masu. Miyo kinthokorerya onamoono aka. Nto miyo kaamweemela va ohiy'ula... .

262 Ni mutthu a miyaakha miloko mithanu ni mithanu, ahiiso miloko mithanu ni miraru, kinrowa okhalana miloko mithanu ni mixexe Apirili, ni weemela va kisuwelaka wira, hata yoowoona ela yookiserya, vaamuweryaneya okhala mahiku aka vakhani ookiserya elapo ya vathi. Miyo—vaamuweryaneya miyo woohiyani muhina mwa mahiku vakhani. Nkisuwenle etthu enihimy'aya. Mwiiwe efiita paahi nto mukhalane emaliheryo anyu. Nkisuwenle etthu enihimy'aya. Kaamweemela va, ni kaaminiki nuusu wira vaamuweryaneya okhala mitthaka saka sookiserya kinrowaaka olaleya, wira sinrowa okhala wenna oPhoenix, ni ohimya etthu yoovonyeya, ni osuwela wira ekiseryo aka ennikilipelela iwe, ni miyo kinoophukiwa mwaha wa moolumo aka?

263 Axinn'aka, mukihye koohimeeryeni ila, ni axinn'aka athiyana. Nyuwo munnikhalaka mmithukumanoni. Moosuwela, olamula sa mmurimani ni itthu. Miyo kootoko wooleelani etthu p'itthu, mwa Nsina n'Apwiya, yahaatonko wiiraneya? Kinoomukoha mutthu ti mutthu. Nnari, mulopwana. Mulaponi mothene, ni soowoona ikonto sene, khasinatoko okhala. Ni kinooleelani ekeekhai ohiy'ula, Ephome ya Yesu Kristu ti yootepa ophierya wira ekukutthe khula nlepa, ni eyo enookhala.

Yookhala Ephattuwelo yoosareya Ephome,
(Nto nyuwo mweemenle Vaavo naanaano va.)

Enikuxiwa mmutikani mwa Emanuweli,
(Etthu emosa paahi yoolipaneya ehanle
mulaponi.)

Memmo anatampi ampwin'aya
moohuruwelani

Annapweteya malep'aya othene oottheke.

264 Kinrowa waavekela arumeyi ala vano, ni axinna, mwaakhanle oorwaka va eriyari y'atthu ala. Onakhaleru pani...Ti siiso, nyuwo muniwiihan'anyu arumeyi wira evekele n'atthu? Arumeyi othene mu, nto, antthuna, akhanle oocaliwa woona minepa woopowa, erwe va yeemele ntoko nikhuru

na mavekelo, vaavo nikhanlyaahu wiiraanaka vamosa, ohiya itthu sothene sikina, ni wiivalaaniha. Ala alopwana n'athiyana anlipherya ekiseryo aya, ohiy'ula, ni Ephome ya Yesu Kristu, emukuxaka Yoowo mwa Masu Awe, aneettiha olukama Ohoolo Wawe, mwa Masu Awe, ni wira, "Miyo kiri va, Pwiya. Miyo nkirina hat'etthu y'ovaha masi yoomi, vano mukikuxe." Munnitthuna orwa weemela ni yaawo, xontte? Mutthu ti mutthu ontthuna, orwe eemele. Muluku ooreeriheni, axinn'aka. Eyo ti yooreera saana. Miyo okisivela owoona atthu akhanle oominyala, ancaliwa ni minepa s'atthu. Miyo kinoona wira, axinn'aka, ti yooreera. Murwe nno. Eyo ti yooreera. Mweemele vaavo. Nrowe paahi vano. . .

²⁶⁵ Napiyaano aphiyerya orumiha esipo, owo atthuna vale, nrowe niipe nsipo nla, voomaaleleya vano, voosuwela, ni nttittimiho.

²⁶⁶ Khaninrweela etthu ya ethale. Hiyo khaninrweela etthu ekhanle paahi wa—wa—waamini wo wiipaka. Masi hiyo nnoorwa Ohoolo wa Muluku, Muluku oowerya sothene Yehova, Yoowo olaihenrye, wira, "Nipuro nintukumanaaya aili wala araru mwa Nsina Naka, vaavo Miyo kinookhala eriyari aya." Mulavule ni Yoowo ntoko mwaarow'anyu wira ni mpatthani anyu, mwiire, "Pwiya, kinnoona othunku. Koottheke." Ni ninrowa wiipa.

Yookhala Ephattuwelo esareiyee Ephome,
Enikuxiwa mmutikani mwa Emanuweli,
Memmo anatampi ampwin'aya
moohuruwelani

Annaapweteya malep'aya othene oottheke.

Nawiiye ole akhw'aka aahitthapela woona
Ephattuwelo ele nihiku nawe;
Vale khino miyo, ootakhala ntoko yoowo,
Enoorapiha itampi saka sothene.

Okhuma okathi koonalyaaka Muro ole mwaha
wo waamini

Okhwalalaka okhuma mmakhwattani
Mwanyu,

Ophenta onvuluxa t'ukhanle mwaha aka,
Ni onookhala mpakha miyo okhwa.

²⁶⁷ Mukhale oowiiyevihaxa vano. Nyuwo khamuhiyo etthu. Khaavo hata mmosa a hiyo okhanle etthu. Ni vaxariya-vo vano, ni murima wothene, muuramihe murima paahi ni muru, mapuro othene, mpaani mothene.

²⁶⁸ Tith'ihu a Wirimu, miyo koosuwela wira Masu Anyu t'eeekhaixa. Awo khakhanle ovonyaka. Awo Masu a Muluku. Awo Mulukuu. Ni Nyuwo muhimmye wira, "Ole onrwa wa Miyo, nkinimurihela ota hata mano." Ni alopwana ala n'athiyana, akupanli, asuwelaka wira awo khakhanle saana, awo aavira ohoolo, ohiy'ula, Pwiya, wira ahimye wira aavonya,

esuwelaka wira aatuphiwa murima ni etthu muhina ya—yaalattunle wira erwe Vephattuweloni. Ni awo yeemenle va, ni muru woowuurama ni murima, wira awurye Maasi a Ekumi, mahale-ene, yaawo alaiheriwe ni Muluku. Waakheleni, Tithi, Momweneni mw'Anyu. Awo t'Awinyu.

269 Nyuwo muhimmye wira, “Khaavo onwerya orwa wa Miyo ehikhanle wira Atithi Aka anoomuruuha toko. Ni othene ale Atithi akivanhe aya animoorwa wa Miyo.” Ni eyo enooniherya wira Muluku ohaavaha ala wa Kristu, ntoko yoovaha ya mphento. Ni awo amphwanyaneya va, Pwiya. “Khaavo onwerya waakumiha mmatatani Mwaka.” Nto miyo kinvekela, Muluku, wira Nyuwo mwaalipiherye ohiy'ula, awo yeemenle-ene va, ni mwaavahe opatiisu wa Erooho Yoowaarya awo aryeene nno waltaari.

270 Owerya wuulupale wa Kristu oponowele ikumi saya vano! Awo aalapa. Aavira ohoolo. Nyuwo muhimmye wira, “Ole onrowa okihimya ohoolo w'atthu, Miyo kinoomuhimya ohoolo wa Atithi Aka ni Malaikha oowaarya.” Hiyo noosuwela wira muteko owo woovariwa.

271 Vano, Pwiya, mwaatthitte ekanyeryo Momweneni mwa natiri, wa Erooho Yoowaarya. Munivahe, Pwiya. Mwaamwaraxele Erooho Anyu, ni mwaasarihe Erooho ya Muluku mukumi, wira ekhale onamoona mukumi mahiku othene a ekumi aya, wa Omwene wa Muluku.

272 Vano muthukumano ovenye. Atthu othene evekeleke vano. Ninrowa ovekela wira ala . . .

273 Vano, khula mmosa a nyuwo ovinre ohoolo nno ohiy'ula, oonaka wira aahikhalana etampi vamurimani, vano khiyaavo etthu mukhanlyaanyu wiiraka woohikhala waamini yeeyo. Yoowaarya . . . Nyuwo munikupali *Yeela* ni waamini. Nno waamini, nyuwo munikupali anyu. Yesu ohimmye wira, “Khaavo onwerya orwa wa Miyo ehikhanle wira Atithi Aka anoomuruuha toko. Ni othene ole onrwa wa Miyo,” Owo onimwaakhela. Owo khokhanle wiiraka etthu ekina, okhala wira Owo oolaiherya. Munnona? Muhimumule vasulu wa moonole vano. Mmumule mwa Masu Awe. Munnona? Masu ahimmye siiso.

274 “Ole oniiwa Masu Aka ni onimwaamini Ole okirumme, ookhalana,” naanaano, “Ekumi ehinimala, ni khonrowa Olamuliwa, masi oovira mookhwaani khuphwanya Ekumi.” Erooho Yoowaarya musuwelelo w'osareya ni waakhela owerya w'ovara muteko. Masi olapa ni omwaakhela Kristu onkhala okhalana waamini ni olapa wanyu, ni wona otaphuwa wira Muluku ohoolelevelani itampi sanyu.

275 Nto vasulu va mulipiheryo wa Masu Awe, Owo iirale, “Khaavo onwerya orwa ehikhanle wira Atithi Aka anoomuruuha toko.” Munnona? Vano, Muluku ohooruhani, toko. “Ni ole onrowa orwa wa Miyo, Miyo nkinimurihela ota

hata mano.” Munnona? Munnona? Nyuwo—nyuwo muhaakhela eyo. Ethhu emosa paahi, nyuwo muhaana . . .

276 Owo—Owo ohookhwelani. Itampi sanyu sooleveleliwa, miyaakha ekonto emosa ni imiya thanu na xexe sivinre. Munoomalaru paahi okupali ethhu Owo owiirenlyaaaweni. Munnona? Ni munnaamini wira Owo okhwenle itampi sanyu? Munoomukupali Owo okhala mukuttho anyu? Mwa moolumo makina, nyuwo mummukupali Yoowo, Ole okunxe itampi sanyu.

277 Munootteeliwa murima ni omuxukhuru Yoowo mwaha wo okuxa itampi sanyu? Munnaamini wira Owo ohiira? Vano nvenxe ntata paahi, mwiire, “Miyo kinnaamini wira Owo onkuxa etampi aka,” amen, “onkuxa etampi aka.” Vaareera.

278 Vano, nyuwo vano mwa namwiivaha wa opatiisu wa Erooho Yoowaarya.

279 Vakhala wira khimwaakhenle opatiisu w’oKristu, mmosa w’axilopwana ala va animoona yeeyo, wira mwaakhele opatiisu w’oKristu.

280 Masi vano, “Petru nlelo alavulaka moolumo ala,” ehinatthi opatiisiwa, “Petru alavulaka moolumo ala, Erooho Yoowaarya yaahaakhuruwela.” Mwaha wa xeeni? Awo othene yaari oowehererya. Vano nyuwo munoowehererya. Munnitthuna Ethhu vano enrowa—enrowa wootthittani ekanyeryo Momweneni mwa Muluku, Ethhu enrowa okhala y’ekeekhai wa nyuwo. Muntthuna wi-. . . Khamuntthuna waakhela Erooho Yoowaarya, khula mmosa a nyuwo? Khamuntthuna Yeeyo? Vekeekhai, munnitthuna. Iwo t’uwerya onoosukani. Munnona?


Yaathukumanne empa y’osulu,
Avekelaka mwa Nsina Nawe, e. . .
Yaahipatiisiwa ni Erooho Yoowaarya,
N’uwerya wa muteko waarwa.

281 Munnona? Oh, ti yeeyo entthunaanyu vano. Ni munoowerya okhalana, naanaano va. Ti yawinyu, naanaano va.

282 Vano, axinna, mwaattame. Nrowe, atthu othene vano, ni niwiixaatherye matata axinna ala, ni nivekele wira yaakhele Erooho Yoowaarya. Mwaattame vano, axinna. Mwaattame vano.

283 Vano, muthukumano wothene, nvenxe matata vano, atthu othene! . . .? . . .

284 Tith’ihu a Wirimu, mwa Nsina na Pwiya Yesu Kristu, musarihe khula murima va ni opatiisu wa Erooho Yoowaarya.

285 Mwaakhele Erooho Yoowaarya. Yaakhele Erooho Yoowaarya, atthu ala va yeemenle ni anlipelela Mukhalelo ni owerya wa Muluku wira oponowele ekumi aya. 

NLOPE NINRUMA NSU NOOHISUWANYEYA EMK63-0114
(A Trumpet Gives An Uncertain Sound)

Mutthak'ola wa Munna William Marrion Branham, opaceryawene olaleeriwe ni Enkelesi Esekunta ohiyu, mahiku yeettaka 14 mweeri wa Janeiro, 1963, oChristian Assembly oPhoenix, Arizona, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org